

INSTRVCTION
DE LA DOCTRINE
CHRESTIENNE.

OU

CATECHISME

FAIT


PAR LE COMMANDEMENT
*de Messieurs les Vicaires Generaux de
Monseigneur l'Eminentissime Cardinal
de Retz Archevesque de Paris.*



A PARIS,

Aux dépens de quelques personnes
de pieté pour l'Hospital General.

M. D C. L I X.



INSTRVCTION DE LA DOCTRINE CHRESTIENNE.

Du nom, & du signe du Chrestien.

LEÇON I.



*Q*ui est celuy qu'on doit appeller Chrestien?

C'est celuy lequel ayant esté baptisé, croit & fait profession de la doctrine Chrestienne.

Qu'est-ce que la doctrine Chrestienne?

C'est celle que Dieu a reuelée, tant par les Saintes Escritures, que par les traditions, ou autrement, & que l'Eglise nous oblige de croire.

Est-il necessaire de sçauoir la doctrine Chrestienne?

Oüy si nous voulons estre sauuez.

Où est-ce qu'on enseigne ordinairement cette doctrine?

Aux Predications & Catechismes.

4

On est donc obligé d'y assister ?

Oüy, tous ceux qui ignorent cette doctrine, & particulièrement ceux qui n'ont pas d'autres moyens suffisans pour l'apprendre.

Quels fruits devons-nous recueillir d'icy ?

1. Faire grande estime d'estre Chrestien, & preferer cette qualité à toute autre.

2. Remercier Dieu tous les iours de nous avoir fait Chrestiens.

3. Faire grand estat de la doctrine Chrestienne, puisqu'elle est si necessaire, s'y rendre assidus, principalement pour ceux qui en ont besoin.

L E Ç O N II.

Q uel est le signe du Chrestien ?

C'est le signe de la Croix, par laquelle nostre Seigneur IESVS-CHRIST nous a rachetez.

Comment le faites-vous ?

Je le fais mettant la main droite au front, puis à l'estomach, après à l'espaule gauche, & delà à la droite, en di-

fant, *Au nom du Pere, & du Fils, & du Saint Esprit.*

Pourquoy le faites-vous ainsi?

Pour signifier les trois principaux mysteres de nostre Religion, à sçauoir la Tres-Sainte Trinité, l'Incarnation, & Redemption.

Comment le signe de la Croix represente-t-il le mystere de la tres-Sainte Trinité?

Dautant que disant au nom, & non pas aux noms, nous signifions qu'il n'y a qu'un seul Dieu; & ces paroles, du Pere, du Fils, & du Saint Esprit, nous expriment les trois personnes de la Tres-sainte Trinité.

Comment le signe de la Croix nous fait-il entendre le mystere de l'Incarnation?

En mettant la main à la teste, puis au dessous de la poitrine, nous signifions que le fils de Dieu est descendu du Ciel, & a pris un corps & une ame au ventre de la Vierge Marie par la vertu du Saint Esprit.

Comment le signe de la Croix signifie-t-il le mystere de la Redemption?

A cause que se signer en forme de

Croix , nous represente la mort que nostre Seigneur IESVS - CHRIST a endurée en la Croix , pour nous transferer de la gauche à la droite , c'est à dire , du peché à la grace , & de la mort à la vie.

Quand faut-il faire le signe de la Croix ?


Le matin quand on se leue , le soir quand on se couche : quand on commence quelqu'œuvre , avant la priere , deuant le repas , quand on se trouue en quelque danger , ou lors que l'on est attaqué de quelque tentation.

Quels fruits denons-nous recueillir d'icy ?

1. Faire tousiours le signe de la Croix avec modestie & reflexion aux mysteres qu'il nous represente.

2. Porter grand honneur aux Croix , & faire la reuerence toutes les fois que nous en rencontrons quelqu'une en nostre chemin.

3. Le faire deuotement aux temps qui nous viennent d'estre marquez.



DE LA FOY.

LEÇON I.

Q' est-ce que la Foy?

Nous auons dit que c'est vn don de Dieu en nos ames, par lequel nous croyons en luy, & à tout ce qu'il a reuelé à son Eglise.

Qu'est-ce à dire croire?

C'est tenir pour très-certain, & très-veritable ce que l'Eglise nous assure que Dieu luy a reuelé, soit écrit ou non écrit, & ce avec plus de certitude & d'assurance que si nous le voyons de nos propres yeux qui sont souuent trompez.

Pourquoy sommes-nous si assurez de ces choses?

Parce que Dieu ne peut mentir, ni se tromper.

Tous les Chrestiens sont-ils obligez de sçauoir en particulier tout ce que l'Eglise propose comme article de Foy?

C'est assez qu'on soit prest de croire & d'exercer vn acte de Foy, quand on

aura connoissance que la chose est proposée par l'Eglise comme article de Foy.

Est ce donc assez de croire généralement ce que l'Eglise croit, & ne croire ni sçavoir rien en particulier des choses de la Foy?

Non, car vn chacun est obligé pour estre sauué, de croire & sçavoir, distinctement pour le moins, les principaux mysteres de la Foy, & les moyens ordinaires que Dieu nous a laissez pour pouuoir operer nostre salut.

Quels sont les principaux mysteres de la Foy?

Ce sont les mysteres de la Tres-Sainte Trinité, de l'Incarnation, & Redemption contenus au Symbole des Apostres.

Qui a fait ce Symbole?

Les douze Apostres après auoir receu le Saint Esprit, auant que d'aller prescher l'Euangile par tout le monde.

Pourquoy l'ont-ils fait?

Pour estre vn sommaire de tout ce que les Chrestiens doiuent croire, &

une marque pour connoistre les Chrétiens d'auec les infideles.

Quand est-ce qu'il faut reciter le Symbole?

Du moins à la priere du soir, & du matin, quand on dit son chapelet, & en d'autres pareilles occasions.

Faites un acte de Foy en general?

Mon Dieu, ie croy & tiens pour certain tout ce que l'Eglise nous oblige de croire, soit escrit, ou non escrit, & ce auec plus de certitude que si ie le voyois de mes propres yeux qui sont souuent trompez.

Quels fruits devons-nous recueillir d'icy?

1. Estre fort reconnoissans enuers Dieu, de nous auoir donné la foy.

2. Estre soigneux de bien apprendre le Symbole par cœur, le reciter souuent, & deuotement.

3. Produire souuent des actes de foy, mais principalement lors que nous sommes tentez contre la foy, & quand nous nous approchons des Sacremens.



L E Ç O N II.

Q*u'est-ce que nous enseigne le premier article du Symbole : Je croy en Dieu le Pere tout-puissant , &c.*

Il nous enseigne qu'il y a vn Dieu qui est le Souuerain Seigneur de toutes choses , & qu'en Dieu il y a trois personnes distinctes , le Pere , le Fils , & le Saint Esprit , lesquelles toutefois ne sont qu'un seul Dieu.

Pourquoy est-ce que la premiere personne de la Tres-Sainte Trinite s'appelle Pere ?

Parce qu'elle a vraiment engendré vn Fils qui est de mesme substance & nature qu'elle.

Quand est-ce que Dieu le Pere a engendré son Fils ?

Il l'a engendré de toute eternité.

Pourquoy est-il appelé Tout-puissant ?

Parce qu'il peut faire tout ce qu'il veut.

Dieu le Pere est-il plus puissant que son Fils ?

Non , parce que le Fils estant Dieu

comme son Pere, & pour mieux dire vn mesme Dieu avec son Pere, ils n'ont qu'une mesme puissance, & sont égaux en toutes choses.

Dieu le Pere est-il plus puissant que le Saint Esprit ?

Non, parce que le Saint Esprit est Dieu aussi-bien que le Pere, & le Fils, ou pour mieux dire, vn mesme Dieu avec le Pere, & le Fils.

Qu'est-ce à dire Createur ?

C'est à dire qu'il a fait toutes choses de rien.

Pourquoy dites-vous seulement Createur du Ciel, & de la terre, Dieu n'a-t-il pas créé toutes choses ?

Oüy, mais par le Ciel, & la terre, qui sont les deux principales parties du monde, on entend ce qui est au Ciel, & en la terre, c'est à dire toutes les Creatures tant visibles qu'inuisibles.

Faites vn acte de foy sur le mystere de la Trinité ?

Mon Dieu, ie croy fermement que vous estes vn seul Dieu en trois personnes distinctes, Pere, Fils, & Saint Esprit, parce que vous l'avez dit.

Quels fruits faut-il recueillir d'icy ?

1. Remercier tous les iours Dieu, de nous auoir créé & mis au monde par sa seule bonté, & pure miséricorde.

2. Reconnoistre que tout ce que nous voyons n'a pas tousiours esté, & n'est à present que parce que Dieu l'a fait.

3. Faire souvent des actes de foy sur ces deux principales veritez, de l'unité de Dieu, & de la trinité des personnes.

LEÇON III.

Q*ue nous apprend le deuxième article, Et en IESVS-CHRIST son Fils unique nostre Seigneur ?*

Que la seconde personne de la Tres-Sainte Trinité, est le vray, seul & naturel Fils de Dieu le Pere, vn mesme Dieu avec le Pere qui l'a engendré de toute eternité, & que ce Fils de Dieu s'estant fait homme, est appelé IESVS-CHRIST qui vaut autant à dire que Sauueur, & celuy de Christ signifie Qinct, ou Sacré.

Pourquoy l'appellez-vous Sauueur?

Pource qu'en effet il nous a sauuez;
& deliurez du peché, de la puissance
& tyrannie du Diable, & de la mort
eternelle.

*Pourquoy IESVS-CHRIST est-il dieu
nostre Seigneur.*

Parce que non seulement comme
Dieu, il nous a créé avec le Pere, & le
Saint Esprit; mais aussi parce que s'e-
stant fait homme, il nous a retiré de
la seruitude du Diable, par ses souff-
rances, & par la mort.

*Comment faites-vous vn acte de Foy sur
cet article?*

Mon Seigneur IESVS-CHRIST, ie-
croy fermement que vous estes le Fils
vnique de Dieu le Pere, & que vous
estes nostre Souuerain Seigneur & Mai-
stre.

Quels fruits faut-il tirer d'icy?

1. Auoir vne tendre deuotion au Saint
Nom de Iesus, soit pour le prononcer
distinctement, soit pour le reuerer en
l'entendant prononcer.

2. Reconnoistre nostre Seigneur IESVS-CHRIST pour nostre Souuerain

Seigneur, & pour cela faire ponctuellement tout ce qu'il nous commande.

3. Regreter de n'auoir obeï par le passé à ses commandemens, comme nous estions obligez.

LEÇON IV.

Q*ue nous apprend le troisième article, Qui a esté conceu du Saint Esprit, né de la Vierge Marie?*

Deux choses, l'Incarnation du Fils de Dieu, & sa Natiuité.

Que signifie l'Incarnation du Fils de Dieu?

C'est que la seconde personne de la Tres-Sainte Trinité, Dieu le Fils, a pris nature humaine, c'est à dire, vn corps & vne ame dans le ventre de la Sainte Vierge Marie, au moyen dequoy celui qui de toute eternité estoit seulement Dieu, commença d'estre homme, sans cesser toutefois d'estre Dieu.

Comment cela a-t-il esté fait?

Par l'operation du Saint Esprit, qui forma du plus pur sang de la Vierge Marie dans ses chastes entrailles le corps

d'un enfant, & au mesme temps crea
vne ame qu'il mit dans ce corps, vnif-
sant ce corps, & cette ame à la secon-
de personne Diuine, qui lors fut Dieu
& homme tout ensemble, & c'est ce
que nous appellons I E S V S - C H R I S T.

*Le Saint Esprit est-il le Pere de nostre
Seigneur I E S V S - C H R I S T.*

Non, car pour estre pere, ce n'est
pas assez de contribuer à la production
de la chose, mais il faut que ce soit en
communiquant sa propre substance.

Qui est donc le Pere de nostre Seigneur?

Comme homme il n'a point de pere,
mais seulement vne mere, qui est la
Sainte Vierge Marie.

*Saint Ioseph n'a-t-il pas esté le pere
de I E S V S - C H R I S T?*

Il a esté seulement son pere putatif
& nourricier; & non pas son pere na-
turel.

Qu'est-ce à dire pere putatif?

C'est à dire, que Saint Ioseph estant
Espoux de la Sainte Vierge, il estoit
reputé son pere parmy les hommes,
qui n'auoient pas la veritable connois-
sance de ce mystere.

Qu'est-ce à dire pere nourricier?

C'est que Saint Ioseph nourrissoit nostre Seigneur comme s'il eust esté son enfant, & I E S V S - C H R I S T luy obeissoit comme s'il eust esté son pere.

Que nous fait entendre l'autre partie de l'article, Né de la Vierge Marie?

Elle nous fait entendre que le Fils de Dieu est sorty du ventre de la Sainte Vierge Marie au bout de neuf mois, sans luy faire souffrir douleur, & sans preiudice de sa Virginité, en telle sorte que la mere de Dieu est non seulement Vierge devant l'enfantement, mais encore après l'enfantement.

Où nostre Seigneur I E S V S - C H R I S T a-t-il pris naissance?

En la ville de Bethleem, en vne pauvre estable.

Faites un acte de Foy sur le mystere de l'Incarnation?

Mon Dieu, ie croy fermement que vostre fils nostre Seigneur I E S V S - C H R I S T, la seconde personne de la Sainte Trinité a pris vn corps, & vne ame comme nous, au ventre de la sainte Vierge Marie, parce que vous l'auez dit.

Quels fruits devons-nous retirer de ce mystere ?

1. Reconnoistre l'amour du Pere eternal de nous avoir donné son fils unique.

2. Remercier nostre Seigneur de sa charité, le reuestant ainsi de nos miseres.

3. Reconnoistre le Saint Esprit contribuant si misericordieusement à ce mystere.

LEÇON V.

Q*ue nous enseigne le quatrième article, Qui a souffert sous Ponce Pilate, a esté crucifié, mort, & ensevely ?*

Il nous enseigne le mystere de nostre Redemption.

Qu'est-ce à dire Redemption ?

C'est à dire, la façon par laquelle **IESVS-CHRIST** nous a rachetez. Dont le sommaire est, qu'ayant demeuré avec les hommes environ trente trois ans, il fut condamné iniustement au fouët par Ponce Pilate, qui pour lors estoit Gouverneur de la Judée, & à la requeste des Juifs, le con-

damna a estre attaché à vne Croix, où il mourut, d'où son corps ayant esté détaché, il fut honnorablement enseuely par des personnes de pieté, & mis au tombeau.

Comment I E S V S-CHRIST est-il mort puisqu'il estoit Dieu ?

Il est mort comme homme, & non comme Dieu, pour satisfaire à son pere pour nos pechez.

N'y auoit-il point d'autre que I E S V S-CHRIST qui pust satisfaire ?

Non, il n'y auoit ni homme, ni Ange qui pust satisfaire suffisamment.

Pourquoy cela ?

D'autant que l'offense faite par le peché contre Dieu, qui est d'une dignité infinie, requeroit aussi vne satisfaction infinie.

I E S V S-CHRIST a-t-il satisfait entierement pour nous ?

Oüy, car estant non seulement homme, mais Dieu, la satisfaction qu'il a rendue à Dieu son Pere pour nos pechez, estoit d'un merite & valeur infinie.

Qu'entendez-vous quand vous dites que

I E S V S - C H R I S T *est mort ?*

I'entends que son Ame a esté separée de son Corps.

La Divinité se separe-t-elle aussi du Corps ?

Non, elle est toujours demeurée vnice au Corps, & à l'Ame.

Comment faites-vous un acte de Foy sur le quatrième article ?

Sauueur de mon ame, ie croy fermement qu'après auoir souffert toutes sortes de tourmens & d'ignominies, vous estes mort en vne Croix pour me racheter.

Quels fruits tirerons-nous de cette instruction ?

1. Aimer & remercier ce Diuin Iesus d'auoir tant souffert pour nous.

2. Auoir vne horreur extrême du peché qui a causé la mort à nostre Seigneur.

3. Ne refuser d'endurer quelque chose pour honorer les souffrances de nostre Seigneur.



LEÇON VI.

Que traite le cinquième article, Est descendu aux Enfers, &c.

Il traite de la descente de IESVS-CHRIST aux Enfers, & de sa Resurrection.

Comment est-ce que IESVS-CHRIST descendit aux Enfers ?

Nous croyons que la personne Divine unie avec le corps demeura au Sepulcre, la même personne unie avec l'ame, descendit aux Enfers.

Qu'entendez-vous par les Enfers ?

Le Limbe des Peres, c'est à dire, un lieu sous terre où reposoient les ames de ceux qui estoient decedez en la grace de Dieu avant la venue de nostre Seigneur IESVS-CHRIST.

Pourquoy descendit-il en ces lieux ?

Afin d'en retirer les ames de ces saintes personnes, & les conduire au Ciel, le iour de son Ascension.

Comment est-ce que IESVS-CHRIST est ressuscité ?

Par soy-mesme, c'est à dire, par la

vertu de la Diuinité , laquelle reünit son ame avec son corps.

Quand est-ce qu'il ressuscita ?

Le troisiéme iour après la mort, que nous appellons le iour de Pasques.

Faites vn acte de Foy de la descente de nostre Seigneur aux Enfers ?


Mon Sauueur , ie croy fermement que vostre Sainte Ame vnie personnellement à la Diuinité est descendue aux Limbes , pour la consolation & déliurance des Saints qui y estoient, & que trois iours après vostre mort vous estes ressuscité glorieux , & immortel.

Quels fruits peut-on recueillir de cecy ?

1. Descendre souuent en esprit dans les Enfers, pour y considerer l'enormité du peché, par les peines qu'endurent ceux qui y sont, pour nous empêcher de tomber dans le mesme malheur.

2. Faire nostre possible pour imiter nostre Seigneur en sa Resurrection, c'est à dire , ressusciter du peché à la grace.

3. Nous encourager de souffrir avec luy pour participer à sa gloire.



Reliure serrée

LEÇON VII.

Q*ue nous apprend le sixième article,
Est monté aux Cieux, &c.*

Le mystere de l'Ascension de I E S U S-
C H R I S T aux Cieux.

Comment est-il monté aux Cieux?

Par la vertu de sa Diuinité, sans l'assistance des Anges, ni d'aucune creature, menant avec soy les saintes ames qu'il auoit tirées hors des Limbes.

Quand est-il monté au Ciel?

Quarante iours après sa Resurrection, qui est la Feste de l'Ascension.

Qu'est-ce à dire, Il est assis à la droite de Dieu son Pere?

C'est à dire, que l'humanité de I E S U S- C H R I S T est égale en gloire, & en honneur à Dieu le Pere, de sorte qu'on l'adore du mesme honneur qui est deu à la Diuinité, à cause de l'vnion qu'elle a avec la personne du Fils.

Dieu le Pere a-t-il une droite?

On se sert de cette façon de parler, pour signifier ce grand honneur qui est

rendu à l'humanité de IESVS-CHRIST dans le Ciel, comme l'on croiroit qu'une personne feroit de grande qualité, que le Roy feroit marcher à son costé droit.

Quand est-ce que le Saint Esprit descendit sur les Apostres?

Le 10. iour après que IESVS-CHRIST fut monté au Ciel, qui est le iour de la Pentecoste.

Faites un acte de Foy sur le sixième article?

Sauueur de mon ame, ie croy qu'après auoir acheué le cours de vostre sainte vie, enfin vous estes monté en corps & en ame au Ciel par vostre propre force où vous estes assis à la droite de Dieu vostre Pere.

Quels fruits deuons-nous retirer de cette instruction?

1. Faire peu d'estime de tous les biens du monde en comparaison de ceux qui nous sont preparez dans le Ciel.

2. Mener icy bas vne vie toute Chrestienne & parfaite, qui ne respire plus que les choses du Ciel.

3. Euitier soigneusement le peché

mortel, luy seul estant capable de nous faire perdre la place qui nous est préparée dans le Ciel.

LEÇON VIII.

DE quoy est-il parlé dans le septième article, Delà il viendra iuger les vivans & les morts ?

Il nous aduertit, qu'un iour arrivera que **LES V S-CHRIST** derechef descendra du Ciel visiblement pour iuger tous les hommes, & rendre à vn chacun selon ses bonnes ou mauuaises œuvres.

Quand sera ce iugement ;

A la fin du monde, car le monde doit prendre fin, mais personne ne sçait quand cela arriuera.

N'y a-t-il point d'autre iugement que le general ?

Oüy, il y en a encor vn autre, qu'on appelle particulier, qui se fait à la mort d'un chacun.

Pourquoy le iugement general, puis qu'à la mort il s'en fait vn particulier de chaque ame ?

Afin que tout le monde connoisse la parfaite iustice de Dieu, qui a rendu au iugement particulier, la recompense selon les merites ou démerites, ce qui est ordinairement inconnu en cette vie; comme aussi afin que le corps reçoive son iugement, & qu'il soit bien-heureux, ou mal-heureux avec son ame.

Faites un acte de Foy sur cet article?

Mon Sauueur, ie croy fermement que nous comparoistront vn iour deuant vous, pour estre iugez de toutes nos actions bonnes & mauuaises, pour en receuoir le chastiment ou recompense, suiuant ce que nous meriterons.

Quels fruits faut-il remporter de cette instruction?

1. Craindre & redouter beaucoup ce iugement à l'exemple de quantité de Saints.

2. C'est de dire tous nos pechez allant à confesse, puisqu'aussi bien tout sera manifesté en ce iour.

3. C'est de nous y preparer de bonne heure, viuans pour cela en bons & veritables Chrestiens.

LEÇON IX.

Q'enseigne le huitième article, le croy au Saint Esprit ?

Que le Saint Esprit est la troisième personne de la tres-Sainte Trinité, qui procede du Pere, & du Fils.

Le Saint Esprit est-il Dieu ?

Oüy, il est Dieu comme le Pere & le Fils, ou pour mieux dire, il est le mesme Dieu, dautant qu'il a la mesme diuinité avec le Pere, & le Fils.

D'où vient qu'on dépeint le Saint Esprit en forme de Colombe ?

C'est à cause qu'il apparut en cette figure au Baptisme de nostre Seigneur I E S U S - C H R I S T, & pour nous faire entendre les effets qu'il produit dans les cœurs des fideles, auxquels il communique la pureté, simplicité, & fécondité en bonnes œuvres.

Quels sont les effets que produit le Saint Esprit dans une ame où il habite ?

J'en remarque quatre principaux. 1. Il la sanctifie par la grace. 2. C'est de l'éclairer & luy faire connoistre les ve-

ritez qui luy estoient inconnuës 3. C'est de l'échauffer & l'embraser de son amour. 4. Il la fortifie contre les tentations, & la console dans ses afflictions.

Avez-vous quelques marques pour connoistre si nous auons le Saint Esprit en nous, & par consequent si nous sommes en chemin de salut?

J'en apporteray quelques-vnes qui sont.
 1. De voir si nous aimons Dieu par dessus toutes choses & le prochain comme nous-mesmes, pour l'amour de Dieu.
 2. Si nous supportons & excusons volontiers les defauts & infirmités. 3. Si nous auons compassion de ses miseres corporelles & spirituelles. 4. Enfin si nous n'auons pas de querelles, ou diuisions parmy nous, c'est vne marque infaillible que le Saint Esprit reside en nous.

Faites vn acte de Foy sur cet article?

Esprit Saint, ie croy que vous estes la troisiéme personne de l'adorable Trinité, en tout égal au Pere, & au Fils.

Quels fruits deuons-nous recueillir de cette instruction?

1. Nous examiner en quel estat nous

ſommes touchant l'amour de Dieu & du prochain.

2. Faire tout noſtre poſſible afin que le Saint Eſprit habite en nous, fuyant tout ce qui peut empêcher cette demeure.

3. Reconnoiſtre que la troiſième perſonne de la Sainte Trinité eſt le Saint Eſprit.

LEÇON X.

Q*ue contient le neuſième article, le croy à la Sainte Eglise Catholique, la Communion des Saints?*

Il parle de la vraye Eglise, Eſpouſe de IESVS-CHRIST, & de la Communion des Saints.

Qu'eſt-ce que l'Eglise?

C'eſt l'aſſemblée de tous les fideles Chreſtiens qui font profeſſion de la Foy de IESVS-CHRIST, ſous l'obeiſſance de noſtre Saint Pere le Pape, comme Vicaire de IESVS-CHRIST, & Succelleur de Saint Pierre.

Par quelles marques peut-on connoiſtre cette Eglise entre pluſieurs aſſemblées qui

usurpent le titre de l'Eglise de Dieu ?

Par quatre marques, sçauoir qu'elle est Vne, Catholique, Apostolique, & Sainte.

Comment est-elle Vne ?

Parce qu'elle professe en tout lieu vne mesme foy, elle vse de mesmes Sacremens, reconnoist vn mesme Chef & Pasteur visible, qui est nostre S. Pere le Pape.

Comment est-elle Catholique, c'est à dire uniuerselle ?

En ce 1. Qu'elle reçoit toutes sortes de personnes, de quelque nation, estat, ou condition qu'elles soient. 2. Qu'elle est estenduë par toutes les parties du monde. 3. Qu'elle a tousiours professé la mesme foy depuis que I E-S-V-S-CHRIST l'a establie, & la professera iusqu'à la fin du monde.

Comment est-elle Apostolique ?

En ce qu'elle a tousiours gardé la foy, & la doctrine enseignée par les Apostres.

Comment est-elle Sainte ?

1. Par le moyen des Sacremens qui donnent la grace sanctifiante. 2. Parce

que son chef, & plusieurs de ses membres sont Saints. 3. En ce qu'elle n'enseigne rien qui ne soit Saint.

Qu'entendez-vous par la Communion des Saints ?

Qu'il n'y a point de fidele (si ce n'est qu'il soit retranché de l'Eglise) qui ne participe en quelque façon au sacrifice de la Messe, & ne communique aux Sacremens, & aux prieres, ieusnes, aumosnes, & autres bonnes œuvres qui se font en cette mesme Eglise Catholique.

Auons-nous quelque communication avec les Saints du Paradis, & les ames du Purgatoire ?

Ouy, car les Messes, & les prieres, & autres bonnes œuvres peuvent soulager les ames qui sont en Purgatoire, comme aussi les intercessions de ceux qui sont au Ciel leur seruent, & à nous en nos besoins & necessitez spirituelles & temporelles.

Faites un acte de Foy sur cet article ?

Mon Seigneur I E S V S - C H R I S T, ie croy que vous auez estably en vostre Eglise vne commune participation des

biens spirituels entre tous les membres d'icelle.

Quels fruits devons-nous recueillir de cette instruction ?

1. Remercier Dieu de ce qu'il nous a fait Chrestiens & membres de son Eglise.

2. Tascher de conseruer la grace de Dieu , afin d'estre membres viuans, & participer à tous les biens qui s'y font.

3. Obeïr volontiers à tous nos supérieurs Ecclesiastiques, le Pape, l'Euesque, le Curé, & s'entraimer l'un l'autre comme membres d'un mesme corps.

LEÇON XI.

Que nous propose le dixième article, La remission des pechez ?

Que IESVS-CHRIST a laissé à l. Sainte Eglise la puissance & l'autorité de remettre tous les pechez, par l'usage des Sacremens de Baptisme, & de Penitence.

Qui a donné le pouuoir à l'Eglise ?

B iiij

Nostre Seigneur avant que de monter au Ciel.

Tous ceux qui sont en l'Eglise ont-ils puissance de remettre les pechez ?

Non, il n'y a que les Prestres, & non tous, mais seulement ceux qui ont charge de nos ames, ou qui sont commis de leur part, si ce n'est en cas de nécessité.

Combien y a-t-il de sorte de pechez ?

De deux sortes : l'originel que nous apportons venans au monde en qualité d'enfans d'Adam : & l'actuel, que nous commettons par nostre propre volonté & malice, quand nous auons atteint l'usage de raison.

Quand vous parlez de la remission des pechez, desquels entendez-vous parler ?

De tous, de l'originel, & de l'actuel.

Comment le peché originel est-il remis ?

Par le Sacrement de Baptême.

Comment le peché actuel est-il remis ?

Par le moyen du Sacrement de Penitence receu avec les conditions nécessaires.

Comment faites-vous un acte de Foy de cet article ?

Mon Dieu, ie croy que dans vostre Eglise il y a remede à toute sorte de pechez pour quelque pecheur que ce soit.

Quels fruits faut-il retirer de cette instruction?

1. C'est de porter vn tres-grand honneur aux Prestres à qui Dieu a donné les clefs du Ciel, pour l'ouurer à ceux qui en seront dignes, & le fermer aux indignes.

2. Ne croupir iamais dans le peché, puisque le remede en est si aisé.

3. Ne desesperer iamais pour quelque peché que l'on ait commis, puisque nous auons vn si puissant remede.

LEÇON XII.

Que nous enseigne l'onzième article, La resurrection de la chair?

Que par la toute-puissance de Dieu, nos ames qui sont immortelles reprendront les corps qu'elles ont animez sur la terre, afin qu'un chacun de nous recoiue en son corps, aussi bien qu'en son ame, la recompense ou le chasti-

ment deu à ses œuvres bonnes ou mauvaises.

Comment cela se fera-t-il ?

Par la toute-puissance de Dieu , & le ministère des Anges.

Pourquoy nos corps ressusciteront-ils ?

Pour recevoir la recompense du bien, ou la punition du mal qu'ils auront fait en ce monde.

Quand est-ce que nous ressusciterons ?

Au dernier iour du iugement à la fin du monde.

Tous les hommes ressusciteront-ils ?

Ouy, les meschans aussi-bien que les bons , mais avec beaucoup de difference.

Quelle difference y aura-t-il entre la resurrection des bons, & celle des meschans ?

C'est que les corps des bons seront clairs & glorieux, au lieu que ceux des meschans seront hideux, grossiers, pesans , & destinez à des peines éternelles.

Faites un acte de Foy sur cet article ?

Mon Dieu, ie croy qu'après ma mort ie reprendray vn iour ce mesme corps, pour estre éternellement bien-heureux,

ou eternellement miserable.

Quels fruits devons-nous retirer de cette instruction ?

1. S'affermir fortement dans la creance de la resurrection de la chair, & y penser souvent.

2. S'encourager par là à souffrir volontiers les maux du corps, puisqu'il sera recompensé à proportion du mal qu'il aura souffert pour Dieu.

3. Ne nous contrister outre mesure pour la mort de nos amis, puisqu'il ressusciteront vn iour, & que leur separation d'auec nous n'est que pour vn temps.

LEÇON XIII.

Q*ue declare le douzième & dernier article, La vie eternelle ?*

Qu'après la vie presente, il y en a vne autre qui ne prendra iamais fin, en laquelle le corps aussi-bien que l'ame de ceux qui auront fait la volonté de Dieu sur la terre, sera comblé de gloire, & de felicité au Ciel.

Qu'entendez-vous par la vie eternelle ?

L'entends le Paradis.

Qu'est-ce que le Paradis ?

C'est vn lieu où on voit Dieu face à face, & où on l'aime pour vne eternité, & c'est-là le premier employ des bien-heureux.

Voit-on aussi nostre Seigneur, & la Sainte Vierge dans le Paradis ?

Ouy, on les voit avec tous les Anges, & tous les Saints.

Quel est le deuxième employ des bien-heureux ?

C'est d'estre dans vn repos perpétuel, qui ne pourra iamais estre interrompu pour quoy que ce soit.

Quelle est la troisième occupation des bien-heureux ?

Ce sera de louer Dieu, de benir son Saint Nom, de le remercier de tous les biens qu'il nous a iamais faits.

Quelle est la dernière chose que feront les bien-heureux dans le Ciel ?

Ce sera d'aimer Dieu à tousiours & à iamais.

Combien durera ce bon-heur ?

Autant que Dieu sera Dieu.

Faites vn acte de Foy sur cet article ?

Mon Dieu, ie croy qu'après cette vie miserable, reste vne vie bien heureuse pour ceux qui auront bien vecu, & obserué vos saints commandemens.

Quels fruits faut-il recueillir de cette instruction?

1. Faire le mesme icy bas que les bienheureux font dans le Ciel, c'est à dire, considerer tousiours Dieu present en tout ce que nous faisons, estre dans l'exemption de tous pechez, louer & glorifier Dieu en tout, & l'aimer de tout nostre cœur.

2. Le remercier de ce qu'il a fait vn Paradis pour ses fideles seruiteurs.

3. Faire nostre possible pour obseruer exactement les Commandemens de Dieu, & de l'Eglise, puisque c'est là l'unique moyen pour paruenir à ce bonheur eternal.

DE L'ESPERANCE.

LEÇON I.

Est-ce assez d'auoir la foy pour estre sauué?

Non, il faut encore auoir l'Esperance.

Qu'est-ce que l'Esperance ?

C'est vn don de Dieu, qui fait qu nous attendons avec assurance la vie eternelle, moyennant la grace, & les bonnes œuures que nous espérons par icelle.

Surquoy est fondée cette Esperance ferme, que les Chrestiens doiuent auoir a la vie eternelle ?

1. Sur la puissance & bonté de Dieu & sa fidelité en ses promesses. 2. Sur les merites de nostre Seigneur IESVS CHRIST. 3. Sur les bonnes œuures que nous faisons avec la grace.

Qu'est-ce que Dieu demande de nous pour obtenir le Paradis ?

1. Que nous gardions les commandemens & ceux de l'Eglise. 2. Que nous ayons recours à luy par la priere.

Quels sont les moyens d'affermir, & de rendre certaine nostre esperance ?

Il y en a deux, la vraye penitence, & la bonne vie.

Comment faites - vous vn acte d'Esperance ?

Mon Dieu, j'espère que par vostre bonté & miséricorde vous me donnerez le pardon de mes pechez, & vostre grace en ce monde & la vie éternelle en l'autre, parce que vous me l'avez promis.

Quels fruits faut-il retirer de cette instruction ?

1. Remercier Dieu, qui par cette vertu nous fortifie de sa puissance.
2. Reconnoître le tort que nous auons, ne nous desespérant dans nos miseres & pechez.
3. Quel doit estre nostre repos, considérant que nous auons Dieu pour nous.

Du Pater noster, ou de l'Oraison Dominicale.

LEÇON II.

Q*uelle est la priere la plus excellente, & la plus agreable à Dieu ?*

C'est le *Pater noster* que nous appelons l'Oraison Dominicale.

Pourquoy l'appellons-nous Dominicale ?

Parce que nostre Seigneur nous l'a luy-mesme enseignée, & qu'elle comprend en peu de mots tout ce que nous deuons demander à Dieu.

A qui parlons-nous en faisant cette Oraison Dominicale?

A Dieu, que nous appellons nostre Pere qui estes és Cieux.

Pourquoy l'appellons-nous nostre Pere?

1. Pource qu'il nous a creez & adoptez pour ses enfans. 2. Afin que nous le prions avec vne confiance filiale.

Pourquoy, nostre Pere, & non pas mon Pere?

Pour monstrier que tous les Chrétiens sont freres par ensemble, puisqu'ils n'ont qu'un mesme pere qui est Dieu.

Pourquoy, qui estes és Cieux?

Pour nous apprendre 1. Que nous ne deuons auoir l'esprit qu'aux biens du Ciel. 2. Que quand nous voudrons prier nous ayons soin d'y esleuer nostre esprit.

Quels fruits faut-il retirer de cette instruction.

1. Faire grand estime de l'Oraison Dominicale.

2. La reciter souvent avec attention, & deuotion , mais particulièrement le matin , & le soir.

3. Regarder souvent le Ciel où est nostre vray Pere celeste.

Des trois premieres demandes du Pater.

LEÇON III.

Combien y a-t-il de demandes au Pater?

Il y en a sept, dont les trois premieres regardent Dieu, & les quatre autres nostre interest particulier.

Que demandons-nous par la premiere, Vostre nom soit sanctifié ?

Nous demandons que Dieu soit honoré, aimé, & seruy de tout le monde, comme il merite.

Qui sont ceux qui sanctifient le nom de Dieu ?

Ceux qui vivent en vrais Chrestiens.

Qui sont ceux qui des-honnorent le saint nom de Dieu :

Les iureurs, les blasphémateurs, les impies, & les libertins.

Que demandons-nous en la seconde de-

mande, Vostre Royaume nous aduienne?

Qu'il regne dans nos cœurs par sa grace, & qu'il nous fasse regner vn iour avec luy dans sa gloire.

Que demandons-nous en la troisième, Vostre volonté soit faite en la terre, &c.

Nous demandons à Dieu la grace de faire en toutes choses sa sainte volonté aussi promptement comme les Anges, & les Saints qui sont dans le Ciel.

Quels fruits faut-il recueillir de cette instruction?

1. Parler volontiers de Dieu, & toujours avec respect.

2. Chercher en tout à faire sa sainte volonté.

3. Viure en sorte, que Dieu regne toujours en nous par sa grace.

Des quatre dernieres demandes du Pater

LEÇON IV.

Que faisons-nous en la quatrième demande, Donnez-nous aujourdhuy nostre pain quotidien?

Après auoir demandé la grace de Dieu, qui est nécessaire pour entretenir

la vie surnaturelle de nostre ame, nous demandons ce qui est necessaire pour conferuer la vie de nostre corps, lequel est l'instrument de l'ame pour faire la volonté de Dieu.

Pourquoy dit-on, Donnez-nous ?

Afin que les riches aussi-bien que les pauvres reconnoissent que c'est Dieu de qui ils reçoivent le moyen de viure, sans l'aide & la benediction duquel tout leur travail, & industrie seroit vaine & inutile.

Pourquoy demandant ce qui est de besoin pour nostre nourriture, ne demandons nous que du pain ?

Pour nous apprendre que nous nous deuons contenter de peu, & ne desirer que ce qui nous est necessaire, sans rechercher les superfluitez, bien que d'ailleurs, sous le nom de pain toutes choses necessaires à la vie presente, soient comprises.

Pourquoy, Auioird'huy ?

Pour nous apprendre à reietter les soucis du lendemain qui nous détournent du seruice de Dieu, & pour nous obliger à nous confier au soin de sa providence.

Que faisons-nous en la cinquième demande, Et nous pardonnez nos offenses comme nous les pardonnons à ceux qui nous ont offensés?

Nous demandons pardon & remission des pechez que nous auons commis.

Pourquoy est-il adiousté, comme nous pardonnons?

Pour faire entendre, que celuy qui ne veut pas pardonner les iniures qui luy ont esté faites, ou qui en conserue le ressentiment, est non seulement indigne, mais incapable de receuoir de Dieu le pardon de ses pechez.

Que faisons-nous en la sixième demande, Et ne nous induisez point en tentation?

Nous demandons que Dieu ne permette pas que nous succombions à la tentation du Diable, du monde, & de la chair, mais qu'il nous donne la grace d'y résister, & de la surmonter.

Que pretendons-nous enfin par la septième demande, Mais déliurez-nous du mal?

Que Dieu nous déliure de toute af-

fiction corporelle & spirituelle, & de tout ce qui seroit preiudiciable à nostre salut.

Quels fruits devons-nous recueillir de cecy ?

1. Ne nous pas tant empressez pour nos necessitez temporelles, mais ietter nostre esperance en Dieu.

2. Ne garder iamais ni haine ni rancune contre personne.

3. Euitier si soigneusement toute tentation, que iamais nous ne tombions dans le peché.

De la Salutation Angelique.

L E Ç O N V.

A *Qui pouvons-nous nous adresser pour bien faire nos prieres ?*

A Dieu, aux Anges, & à ses Saints.

En quel façon devons-nous nous adresser à Dieu ?

Le suppliant de nous accorder ce que nous luy demandons par les merites de nostre Seigneur I E S U S

C H R I S T.

En quelle façon devons-nous nous adresser

ser aux Anges, & aux Saints?

Les suppliant comme amis de Dieu de prier pour nous qu'il nous octroye ce que nous luy demandons.

Qui est-ce d'entre les Saints qui a plus de pouvoir auprès de Dieu, & que nous devons plus souvent invoquer?

La Sainte Vierge Mere de nostre Seigneur I E S V S - C H R I S T.

Quelle est l'Oraison qui luy est la plus agreable?

C'est la Salutation Angelique, parce que par icelle le mystere de l'Incarnation luy a esté annoncé.

Quand faut-il reciter cette priere?

Quand on sonne le pardon le matin à midy, & au soir, toutes les fois que l'heure sonne, mais ne l'omettre jamais quand nous faisons la priere du soir, & du matin.

Quels fruits faut-il recueillir de cette instruction?

1. Remercier Dieu de ce qu'il a inspiré à son Eglise vne Oraison si belle si courte, & si agreable à la Vierge.

2. Ne passer iournée sans la reciter mais avec des sentimens de deuotion.

3. Avoir recours à la Sainte Vierge dans tous nos besoins & necessitez.

DE LA CHARITE.

LEÇON I.

Suffit-il pour estre sauvé d'avoir la Foy & l'Esperance?

Non, il faut aussi la charité, sans laquelle la Foy & l'Esperance sont mortes, c'est à dire, inutiles pour le salut.

Qu'est ce que la Charité?

C'est vne vertu infuse de Dieu en nos ames, qui nous le fait aimer sur toutes choses pour l'amour de luy-mesme, & le prochain comme nous-mesmes pour l'amour de Dieu.

Qu'est-ce qu'aimer Dieu sur toutes choses?

C'est l'aimer plus qu'aucune creature, & que nous-mesmes, & choisir plutôt de mourir, que l'offenser mortellement.

Qu'est-ce qu'aimer Dieu pour l'amour de luy-mesme?

C'est l'aimer à cause qu'il est infiniment bon, & digne d'estre aimé.

Faites un acte d'amour de Dieu ?

Mon Dieu , ie vous aime de tout mon cœur , & deteste tout ce qui vous déplaist.

Qu'est-ce qu'aimer son prochain comme soy-mesme ?

C'est luy faire & luy desirer le bien que nous voudrions nous estre fait ?

Qu'est-ce que l'aimer pour l'amour de Dieu ?

C'est l'aimer à cause que Dieu le commande , qu'il porte l'image de Dieu , & que Dieu l'aime.

Qui est nostre prochain ?

Tous les hommes de quelque estat & religion qu'ils puissent estre.

Quels fruits faut-il recueillir , &c.

1. Reconnoistre la bonté de Dieu , qui nous a rendu capables de l'aimer sur toutes choses , & nostre prochain comme nous-mesmes , par le moyen de cette vertu.

2. Aimer Dieu , & le prochain non seulement de paroles , mais d'effet.

3. Nous estudier de conseruer inuio-
lablement en nous cette vertu de cha-
rité.

Des Commandemens en general?

LEÇON II.

Quelle est la vraie marque de la charité?

C'est l'obseruance des Saints Commandemens de Dieu.

Combien y a-t-il de Commandemens de Dieu?

Nous auons cy-deuant dit qu'il y en a dix.

Qui a fait ces dix Commandemens?

C'a esté Dieu mesme qui les donna à Moÿse sur la montagne de Sinay, afin que les Iuifs les obseruassent, & IESVS-CHRIST du depuis les a confirmez en la nouuelle Loy.

Qui sont ceux qui sont obligez de garder les Commandemens de Dieu?

Tous ceux qui veulent estre sauuez.

Est-il necessaire de les garder tous?

Ouy, & il suffit de manquer à vn seul pour estre damné.

Les pouuons-nous garder & accomplir entierement?

Nous ne le pouuons pas de nous-mes-

mes, mais bien avec la grace de Dieu, qu'il donnera à ceux qui la luy demanderont.

Quelle recompense Dieu a-t-il promis à ceux qui garderoient ses Commandemens?

Les biens temporels en ce monde, & la vie éternelle en l'autre, & tout au contraire vne infinité de maux est réservée en cette vie, & le feu éternel en l'autre à ceux qui les mépriseront.

Quels fruits faut-il recueillir de cecy?

1. Remercier Dieu de ce qu'il nous a voulu donner luy-mesme des regles de vie.

2. Apprendre tres-soigneusement les Commandemens de Dieu.

3. Les observer encore plus fidelement.

Du premier Commandement.

LEÇON III.

A Quoy nous oblige le premier Commandement, *Vn seul Dieu tu adoreras, & aimeras parfaitement?*

A aimer & adorer Dieu de tout nostre cœur.

Qu'est-ce qu'adorer Dieu ?

C'est le reconnoistre pour ce qu'il est, & se soumettre à luy.

Comment est-ce qu'on adore Dieu ?

Par les actes interieurs, & extérieurs de Foy, d'Espérance, & de Charité, & de Religion.

Comment faites-vous un acte d'adoration ?

Mon Dieu, ie vous adore du plus profond de mon cœur pour mon Createur, & mon Souuerain Seigneur, & reconnois que ie ne suis rien deuant vous.

Quand est-ce principalement qu'un Chretien doit adorer Dieu ?

Tous les soirs & matins à genoux, quand on s'approche du tres-Saint Sacrement, assistant à la Sainte Messe, & quand on entend iurer le Saint nom de Dieu.

Que nous defend le premier Commandement ?

1. Tous les pechez contre la Foy, comme l'idolatrie, l'heresie, la superstition, la sorcellerie. 2. Les pechez contre l'Espérance, comme le desespoir & la presumption. 3. Le peché qui est directe-

ment contre la Charité, qui est la haine de Dieu.

Honorer les Saints, n'est-ce point contre ce premier Commandement ?

Non, car nous ne les reconnoissons pas pour les premiers principes, & la fin suprême de toutes choses, ainsi que nous reconnoissons Dieu; mais nous les honorons comme amis de Dieu.

Peut-on aussi sans faire contre ce Commandement, honorer les Images, & les Reliques des Saints.

Ouy, parce que nous ne les honorons pas à cause d'elles, mais à cause des Saints qu'elles nous représentent.

N'est-ce pas diminuer l'honneur de Dieu, d'honorer ainsi les Saints ?

Non, mais plustost l'accroistre, car l'honneur que nous rendons aux Saints retourne à la gloire de Dieu, qui est loüé & glorifié en ses Saints, comme la source & l'origine de toute sainteté, & l'auteur de toute leur gloire & félicité.

Quels fruits devons-nous retirer, &c.

1. Observer ce commandement qui est si doux, puisqu'il nous oblige à

aimer & honorer Dieu.

3. Faire souuent des actes de ces quatre vertus, par lesquelles on honnore Dieu, sçauoir est de Foy, d'Esperance, de Charité, & de Religion.

3. S'examiner souuent sur les pechez que l'on commet contre ces quatre vertus.

Du second Commandement.

LEÇON IV.

Q*ue nous est-il defendu par le second Commandement, Dieu en vain ne iureras, ne autre chose pareillement?*

De prendre le nom de Dieu en vain, & le deshonnorer.

En combien de façons deshonnore-t-on le Nom de Dieu.

En trois principalement, par le iurement, par le blaspheme, & le mespris des vœux.

Comment deshonnore-t-on le Nom de Dieu par le iurement?

En trois façons. 1. Jurant contre la verité. 2. Jurant de faire ce qui est iniuste. 3. Jurant sans necessité pour peu

de chose, & sans respect.

En combien de façons deshonore-t-on Dieu par le blasphème?

En quatre façons. 1. Attribuant à Dieu ce qui ne luy conuient pas. 2. Luy déniaut ce qui luy appartient. 3. Attribuant aux creatures ce qui appartient à Dieu seul. 4. Prononçant le Nom de Dieu par despit, le maugreant, ou iurant sa mort, son sang, &c.

Comment offense-t-on Dieu par le vœu?

1. Quand on ne le fait pas comme il faut. 2. Quand on ne l'accomplit pas du tout, ou en partie, le pouuant. 3. Quand on le differe sans cause legitime.

Qui sont ceux qui ne font pas bien leur vœu.

Ceux qui le font à d'autre qu'à Dieu.

2. Qui le font d'une chose mauuaise ou indifferente, ou qui mettent empeschement à vne meilleure. 3. Quand on l'accompagne de superstition.

Que nous est-il ordonné par le second Commandement?

D'honorer le Nom de Dieu.

En combien de façons le pouuons-nous honorer?

En trois principales. 1. Le iurant avec verité, iustice, & iugement. 2. Louant Dieu, & le benissant. 3. Faisant des vœux comme il faut, & les accomplissant en temps & lieux.

Quels fruits faut-il recueillir de cette instruction ?

1. Se garder soigneusement de s'accoustumer, ou à iurer, ou à blasphemer, & si on y estoit accoustumé s'en corriger.

2. Ne se point engager facilement à des vœux.

3. Accomplir au plustost ceux qu'on a fait.

Du troisième Commandement.

LEÇON V.

Q*V'ordonne le troisième Commandement, Les Dimanches tu garderas en servant Dieu deuotement ?*

Que nous obseruions le Sabat, qui est entre les Chrestiens le iour de Dimanche, l'employant à seruir & honorer Dieu.

Que faut-il faire pour observer le Dimanche ?

Dieu ordonne en general, que nous nous exercions es bonnes œuvres; mais l'Eglise specialement commande d'oïr la Messe, & desire aussi que l'on assiste à la grande Messe, au Profne, à Vespres, & autres instructions qui se font à la Parroisse.

Qu'est-il defendu de faire le Dimanche ?

Toutes œuvres seruiles, & mechaniques, tout trafic & marchandise.

Qui sont les pechez qui se commettent contre ce commandement ?

1. Ne point entendre la Messe. 2. Ne la point oïr entierement. 3. Songer à autre chose pendant la Messe, notamment à des pensées mauuaises. 4. Empescher les autres d'entendre la Messe. 5. Trauailer ces iours-là, ou faire trauailer. 6. Aller au cabaret, danser à chansons deshonnestes.

Quels fruits faut-il recueillir de cette instruction ?

1. Donner à Dieu ces iours qu'il s'est reseruez, luy qui nous a tout donné.

2. Employer le tout à son honneur & service.

3. N'en rien donner au Diable , se donnant de garde d'offenser Dieu ces iours-là.

Du quatrième Commandement.

LEÇON VI.

A *Quoy nous oblige ce Commandement, Pere & mere honnoreras, afin que tu viues longuement?*

De rendre à nos pere & mere ce que nous leur deuons.

Que faut-il entendre par ces mots de pere & mere?

Toutes les personnes qui nous sont en quelque façon superieures.

A quoy sont obligez les enfans par ce Commandement?

A quatre choses principales. 1. A aimer leurs parens. 2. Les respecter. 3. Leur obeïr. 4. Les assister en leurs necessitez.

Quels sont les pechez qui se commettent par les enfans contre leur pere & mere?

Leur desirer du mal, les haïr, les mé-

priser, murmurer contre eux, leur desobeir, & ne les pas assister corporellement, ou spirituellement, s'ils en ont besoin.

Ce Commandement n'oblige-t-il pas les peres & meres à quelque devoir vers leurs enfans ?

Il les oblige à quatre choses, les nourrir, les enseigner, les corriger, & leur donner bon exemple.

Quels fruits faut-il recueillir de cette instruction ?

1. Tascher de sçavoir bien les devoirs que l'on doit à chacun, afin de les leur rendre.

2. Se surmonter dans la peine que l'on a de rendre ces devoirs à vn chacun.

3. S'examiner souuent sur les pechez qui se commettent contre ce commandement.

Du cinquième Commandement.

LEÇON VII.

Q*ue nous defend ce Commandement. Homicide point ne seras, de fait,*

ne volontairement ?

Il nous defend de nuire à la vie de nostre prochain, tant spirituelle, que corporelle.

En combien de façons pouvons-nous nuire à la vie corporelle du prochain ?

En trois façons. 1. Par pensées, le haïssant ou desirant du mal. 2. Par paroles, le maudissant ou iniuriant. 3. Par œuvres, le tuant, ou le blessant.

Comment pouvons-nous nuire à la vie spirituelle du prochain ?

Par le scandale, qui est vne parole ou action mauuaise qui donne occasion au prochain d'offenser Dieu.

Que nous ordonne ce Commandement ?

D'assister nostre prochain tant en la vie spirituelle, que corporelle. 2. Pardonner les iniures à ceux qui nous auroient offensez, & nous reconcilier avec nos ennemis.

Quels fruits devons-nous tirer de cecy ?

1. Admirer le soin que Dieu a pour la conseruation de nostre vie.

2. Euitier soigneusement toutes les occasions de scandale.

3. N'en nourrir aucune contre son prochain.

Du sixième Commandement.

LEÇON VIII.

Q'est-ce que Dieu nous defend par ce Commandement, Luxurieux point ne seras, de corps, ni de consentement?

Il nous defend toutes pensées, paroles, regards, & actions deshonneſtes.

Defend-on aussi en ce Commandement les occasions, qui ordinairement induisent & disposent à l'impureté?

Ouy, comme sont les yuogneries, les danses meſſeantes, les baisers, les regards, les attouchemens, l'oysiueté, &c.

Que nous ordonne ce Commandement?

De viure chaſtement.

Quels fruits faut-il recueillir, &c.

1. Estre ſoigneux d'éviter toutes les occasions qui pourroient nous faire tomber dans quelque peché d'impureté.

2. Reſiſter d'abord aux tentations & pensées deshonneſtes.

3. Eſtimer beaucoup la chaſté, & la demander inſtamment à Dieu.

Du septième Commandement.

L E Ç O N IX.

Q*ue nous defend le septième Commandement, Le bien d'autrui tu ne prendras, ne autre chose pareillement ?*

Il nous defend de prendre le bien d'autrui, ou de le retenir iniustement.

Est-ce aussi offenser Dieu d'avoir la volonté de prendre le bien d'autrui, ou nous en servir iniustement ?

Ouy, cela nous est aussi defendu par ce Commandement.

A quoy nous oblige ce Commandement ?

1. A conseruer & maintenir le bien d'autrui autant que nous pouuons. 2.^{es} De donner l'aumosne aux pauvres à proportion des biens que Dieu nous a donnez. 3. Et faire restitution du bien qui n'est pas à nous.

A qui faut-il restituer ?

A celuy là mesme à qui il appartient si on le connoist, sinon il en faut faire des aumosnes, ou faire prier Dieu pour luy.

Quand faut-il faire la restitution ?

Au plustost , & mesme s'il est possible avant que de se confesser.

Si on ne peut faire restitution du total, & qu'on le puisse d'une partie, faut-il attendre qu'on puisse restituer le tout.

Non, il faut toujours executer ce que l'on peut pour le present, & attendre pour le reste quand on aura la commodité.

Quels fruits devons-nous retirer, &c.

1. Nous contenter du bien qu'il a plu à Dieu nous donner, sans en vouloir avoir davantage iniustement.

2. Satisfaire au plustost de ce que l'on doit à autrui.

3. Ne contribuer jamais à vne personne qui veut faire tort au prochain.

Du huitième Commandement.

LEÇON X.

Q*ue nous defend ce Commandement, Faux témoignage ne diras, ne mentiras aucunement?*

Toute iniustice qui se fait par paroles contre le prochain.

En combien de façons se commet cette injustice contre le prochain ?

En trois façons. 1. Par faux témoignages, iurant deuant vn Iuge contre nostre propre conscience. 2. Par mensonge, proferant de bouche ce que l'on n'a pas en la pensée, avec intention de tromper. 3. Par la médifance ou de-
traction, disant quelque chose contre l'honneur du prochain, à dessein de le diffamer.

*En combien de façons se commet la de-
traction ?*

En quatre. 1. Imposant fausement. 2. Augmentant le mal. 3. Publiant la faute cachée. 4. Interpretant à mal les actions d'autrui.

N'offense-t-on pas Dieu en autre façon contre ce Commandement ?

Ouy, en semant des noises entre les amis, ce qui est vn tres-grand peché.

*Que nous ordonne le huitième Com-
mandement ?*

De dire tousiours la verité en nos paroles, & de reparer le tort qu'on a fait au prochain par le faux serment, & par le mensonge ou médifance.

Quels fruits devons-nous retirer, &c.

1. Espargner toujours la reputation de nostre prochain en toutes nos paroles.

2. Si nous auons fait quelque tort à sa renommée, la reparer au plustost.

3. Aimer la verité, & la sincerité en tout.

Du neufuième Commandement.

L E Ç O N X I.

Q*ue defend le neufuième Commandement, L'œuvre de chair ne desire-
ras qu'en mariage seulement ?*

Il defend non seulement toute pail-
lardise, comme le sixième, mais aussi
les pensées deshonneſtes, & les ſales de-
ſirs.

*La penſée deshonneſte eſt-elle toujours
peché ?*

Non, car quand elle nous déplaist,
& que nous la repouſſons, nous n'of-
fenſons point, ainſi nous meritons.

*Comment donc offenſons-nous par la
penſée ?*

En trois façons, 1. Quand on y con-

sent, ayant la volonté, & étant en la resolution de commettre le peché. 2. Quand on s'y veut arrester pour y prendre plaisir. 3. Quand on reconnoist qu'on s'entretient en cette pensée, & qu'on neglige volontairement à la rejeter.

Quels fruits faut-il recueillir de cette instruction?

1. Estre diligent & soigneux à rejeter tous les desirs mauuais d'abord qu'on les apperçoit. 2. Quand les desirs mauuais nous importunent auoir recours à l'Oraison. 3. Demander pardon à Dieu des negligences passées à rejeter tous desirs & pensées mauuaises.

Du dixième Commandement.

L E Ç O N XII.

Q'est-ce que Dieu nous ordonne, & nous defend par ce Commandement, *Biens d'autrui ne conuoieras, pour les auoir iniustement?*

Il ordonne que nos desirs soient tellement bornez, qu'ils ne se portent iamais aux biens d'autrui, & nous de-

fend de ne rien conuoiter pour le posseder iniustement.

Qu'entendez-vous par les biens d'autrui ?

Il faut entendre & les biens immeubles, comme sont maisons & metairies, & meubles, comme sont les fruits, bestiaux, & semblables, qu'il ne faut iamaïs conuoiter iniustement.

N'est-il iamaïs permis de desirer le bien d'autrui pour nostre plus grande commodité ?

Ouy, on le peut, mais avec des voyes iustes, licites, & honnestes.

Tous les desirs qu'on a du bien d'autrui ne sont donc pas mauvais ?

Il est vray, car pour estre mauvais, il faut qu'ils soient contre la charité, & contre la iustice.

Qui sont ceux qui contreviennent à ce Commandement.

1. Ceux qui desirent iniustement le bien d'autrui, & non seulement ceux-là, mais encore ceux qui desirent avec trop d'ardeur les richesses & autres biens du monde. 2. Ceux qui sont dans la disposition d'employer toutes sortes

de moyens licites ou illicites pour accroistre & multiplier les biens qu'ils ont.

3. Les Marchands & autres personnes de trafic qui desirent chereté pour en profiter. 4. Les Soldats qui s'enrollent pour ravier le bien d'autrui. 5. Les Medecins qui souhaitent les maladies. 6. Les Officiers de Justice qui desirent les discordes & prolongations de procez.

Quels fruits faut-il retirer, &c.

1. Reprimer en nous non seulement les desirs iniustes & illicites, mais aussi moderer ceux qui semblent licites.

2. Quand nous desirons les biens qui nous sont necessaires, les desirer autant qu'il est agreable à Dieu.

3. Nous remettre souuent en memoire cette belle sentence de Saint Paul : *Ayant de quoy sustenter nostre vie, & couvrir nostre corps, soyons contents, car ceux qui veulent deuenir riches, s'exposent à des tentations dangereuses, & tombent dans les pieges du Diable.*



Des Commandemens de l'Eglise.

LEÇON XIII.

Est-on obligé sous peine de peché d'observer les Commandemens de l'Eglise?

Ouy, tout Chrestien y est obligé, s'il n'en est dispensé par des empeschemens legitimes.

Combien y a-t-il de Commandemens de l'Eglise?

Nous auons dit qu'il y en a six.

Pourquoy l'Eglise nous a-t-elle donne ces Commandemens?

Pour nous declarer plus particulièrement la volonté de Dieu.

Que nous est-il enioint au premier Commandement, Festes & Dimanches Messoyras en servant Dieu deuotement?

Elle nous enioint d'assister non seulement à la Messe les Dimanches, mais aussi les Festes.

Qui a institué les Festes?

La Sainte Eglise, par l'autorité qu'elle a receuë de IESVS-CHRIST.

Pourquoy les a-t-elle instituées ?

1. Pour nous remettre en memoire les myſteres, & les bien-faits que nous auons receus de noſtre Seigneur. 2. Pour honnorer les Saints. 3. Pour l'inſtruction des Chreſtiens, qui en ces iours là peuuent apprendre de leurs Paſteurs les choſes qui regardent leur ſalut.

Qu'ordonne le deuxiême, Tous tes pechez confeſſeras à tout le moins vne fois l'an ?

Il oblige de ſe mettre pour le moins vne fois l'an en l'eſtat de grace par la confeſſion de tous nos pechez faite au Preſtre, qui a puiffance de nous abſoudre.

A quoy nous oblige le troiſiême, Ton Createur recevras au moins à Paſque humblement ?

Il oblige tous ceux qui ſont paruenus à l'âge de diſcretion, de recevoir en leurs paroiffes le Saint Sacrement de l'Autel au moins vne fois l'an, & ce durant la quinzaine de Paſques.

A quel âge doivent ordinairement communier les enfans ?

Ils ne doiuent differer ordinairement que iusques à douze ans , si ce n'est que leur Curé iuge qu'il soit necessaire de la differer dauantage.

Qu'ordonne le quatrième , Les Festes tu sanctifieras qui te sont de commandement ?

Non seulement il defend de s'employer aux œuures seruiles les iours de Festes , mais de plus il nous oblige de vaquer aux œuures saintes , comme assister au seruice diuin , à la predication , & autres œuures de pieté , & de deuotion.

Que veut dire le cinquième , Quatre Temps , Vigiles ieusneras , & le Carefme entierement ?

Il nous commande de ieusner certains iours de l'année , sçauoir le Carefme entier , excepté les Dimanches , les iours que l'on appelle les Quatre Temps , les Vigiles de Festes , esquelles il est commandé de ieusner , enquoy chacun doit se conformer à l'usage de son Diocese.

Comment doit-on ieusner ?

On doit s'abstenir en Carefme de chair , & d'œufs , comme aussi de fro-

mage, si ce n'est que Monseigneur l'Archevesque'en ait dispensé; mais aux autres ieunes on peut vser d'œufs, & de fromage. 2. On doit prendre le repas seulement vne fois le iour.

A quelle heure doit-on prendre ce repas?

Environ le midy, bien est-il vray que l'on peut faire vne petite collation au soir.

Qui sont ceux qui sont obligez de ieuner?

Tous ceux qui ont atteint l'âge de vingt-vn an, si ce n'est qu'ils ayent empeschement legitime, ou par infirmité, pauureté, grand travail, ou pour quelque autre raison semblable.


Enfin que defend le sixième, Vendredy chair ne mangeras, ni le Samedy pareillement?

Il defend d'vser de chair le Vendredy & Samedy, & ce pour faire vn peu de penitence, & pour nous preparer à celebrer saintement le iour de Dimanche: il faut excepter les Samedis depuis le iour de Noël, iusques au iour de la Purification, auxquels il est permis dans

le Diocese de Paris, & quelques autres
de manger de la viande.

*Quels fruits faut-il recueillir de cette
instruction?*

1. Avoir tres-grand respect pour l'Eglise, & tout ce qu'elle nous ordonne.
2. Ne point demander facilement dispense, & encore moins se dispenser de son autorité de ce que l'Eglise commande.
3. Ne pas souffrir qu'on méprise les Commandemens de l'Eglise en nostre presence.



DES SACREMENTS.

LEÇON I.

Est-il difficile à l'homme d'observer les
Commandemens de Dieu?

Ouy, à cause de la corruption de la
nature.

*Qu'est-ce qui nous peut faciliter l'ob-
servance des Commandemens de Dieu?*

C'est la grace de nostre Seigneur.

Comment communique-t-il cette grace?

Par le moyen des Sacremens.

Qu'est-ce

Qu'est-ce Sacrement ?

C'est vn signe sacré, & visible institué de nostre Seigneur IESVS - CHRIST pour sanctifier les hommes, & conferer la grace.

Combien y a-t-il de Sacremens ?

Nous auons dit qu'il y en a sept, Baptême, Confirmation, Penitence, Eucharistie, Extreme-Onction, l'Ordre, & le Mariage.

Pourquoy nostre Seigneur a-t-il institué plusieurs Sacremens ?

C'a esté pour remedier à toutes les necessitez spirituelles de nos ames.

Quels fruits faut-il recueillir, &c.

1. Concevoir vne très-haute estime des Sacremens, & pour cela ne nous en approcher iamais qu'avec respect & deuotion.

2. Reconnoistre le soin que Dieu a eu de nous, & de nostre salut en l'institution des Sacremens.

3. Procurer autant qu'il est en nous, que les Sacremens soient administrez avec decence, & pour cela donner volontiers aux pauvres Eglises les choses nécessaires à cette administration.

Du Baptême.

LEÇON II.

L *Equel est le plus necessaire de tous les Sacremens?*

C'est le Baptême, personne ne pouvant estre sauvé qu'il ne soit baptisé.

Qu'est-ce que le Baptême?

C'est vn Sacrement par lequel nous sommes faits Chrestiens.

Ceux-là font-ils bien, qui pour attendre un parain different plusieurs iours le Baptême de leurs enfans?

Non, & si les enfans venoient à mourir durant ce temps, ils en seroient responsables deuant Dieu.

Où faut-il baptiser les enfans?

En la Parroisse, & non ailleurs, si ce n'est en cas de necessité extrême.

Que faut-il pour faire le Sacrement de Baptême?

Il faut verser de l'eau naturelle sur l'enfant, & en mesme temps dire ces paroles, *Je te baptise au nom du Pere, & du Fils, & du Saint Esprit, avec intention de baptiser.*

*Que fait le Sacrement de Baptême en
celuy qui le reçoit?*

1. Il le nettoye de toute sorte de péché, & de toute sorte de peine due pour iceluy. 2. Il le marque du caractère des enfans de Dieu. 3. Il donne pouuoir de receuoir les autres Sacramens. 4. Il donne droit à l'heritage eternal.

Quelles promesses fait celuy qui est baptisé?

1. De croire en IESVS-CHRIST, imiter sa vie, & garder ses Commandemens. 2. De renoncer à Sathan, à ses pompes qui sont toutes les vanitez du monde, & à ses œuvres qui sont toutes sortes de pechez.

Quels fruits faut-il retirer, &c.

1. Remercier souvent Dieu de la grace du Baptême.

2. Nous humilier beaucoup en sa presence, voyant combien de fois nous auons perdu cette grace par nos pechez.

3. Renoueller quelquefois, mais principalement au iour anniuersaire de nostre Baptême, les promesses que

nous auons faites receuant ce grand Sacrement.

De la Confirmation.

LEÇON III.

NOUS auons desia dit ce qui concerne ce Sacrement, dont l'on peut se rafraichir la memoire dans le Catechisme precedant.

Après auoir esté confirmé que faut-il faire ?

Ayant receu la benediction de l'Euesque, faut se retirer à l'écart pour remercier Dieu de la grace receuë, dire le *Pater*, *Aue*, & *Credo*, & garder son bandeau deux ou trois iours, puis le faire oster par vn Prestre en sa Paroisse.

Quels fruits faut-il retirer, &c.

1. Remercier Dieu d'auoir pourueu avec tant de bonté à nostre foiblesse, instituant le Sacrement de Confirmation.

2. Tascher de faire vn bon vsage de la grace de ce Sacrement, n'ayant ia-

mais honte de confesser IESVS-CHRIST
par paroles, & par œuvres.

3. Avoir vn soin particulier que ceux
qui sont sous nostre charge reçoivent
ce Sacrement, mais avec les dispositions
requises.

De la Penitence.

LEÇON IV.

Que faut-il faire quand on a offen-
sé Dieu ?

Il faut faire Penitence.

Qu'est-ce que la Penitence ?

C'est vn Sacrement institué de nostre
Seigneur pour remettre les pechez com-
mis après le Baptême.

*Tous ceux qui font Penitence obtien-
nent-ils le pardon de leurs pechez ?*

Non, mais seulement ceux qui la
font avec les conditions nécessaires.

Quelles sont ces conditions ?

1. Examiner la conscience. 2. Estre
marry d'auoir offensé Dieu. 3. Faire vn
ferme propos de n'y plus retourner.
4. Dire tous ses pechez au Prestre. 5. Sa-
tisfaire à Dieu, & à son prochain.

Que faut-il faire quand on a manqué à quelqu'une de ces conditions?

Il faut recommencer sa confession comme si on ne l'auoit pas fait, & s'accuser de la faute commise manquant à quelqu'une de ces conditions.

Quels fruits faut-il retirer, &c.

1. Remercier Dieu de nous auoir donné vn remede si facile pour nos pechez.

2. Reflexhir sur nos penitences passées, & voir si nous auons tousiours obserué les conditions susdites.

3. Ne croupir iamais dans le peché, pouuant en sortir facilement.

De l'Extreme-Onction: & du Mariage.

LEÇON V.

Q'v'est-ce que l'Extreme-Onction?

C'est vn Sacrement qui nous fortifie contre les assauts du Diable à l'heure de la mort.

Faut-il attendre qu'on soit à l'extrémité pour le recevoir?

Non, il suffit d'estre au peril evident de mourir.

Quels sont les effets de ce Sacrement ?

1. Il nous donne force contre les assauts du Demon. 2. Nous donne grace pour porter nostre mal patiemment, & en faire bon vsage. 3. Il nous rend la santé corporelle, si Dieu le iuge à propos pour sa gloire, & pour le salut de nos ames.

Que faut-il faire pour recevoir ce Sacrement ?

Faut n'auoir aucun peché en sa conscience. Et après l'auoir receu, ne penser plus qu'à son salut, & à bien mourir.

Qu'est-ce que le Mariage ?

C'est vn Sacrement par lequel l'homme & la femme sont conioints ensemble legitimement pour auoir des enfans, & les éleuer Chrestiennement selon Dieu.

Que faut-il faire pour s'y engager saintement ?

Trois choses. 1. Voir si Dieu nous y appelle, & pour le connoistre consulter quelque homme sage, & desintéressé. 2. Se mettre en bon estat par vne bonne confession generale. 3. Auoir

intention d'accomplir la volonté de Dieu , & faire son salut.

Quels fruits faut-il recueillir de cette instruction ?

1. Pour l'Extreme-Onction, n'attendre jamais à la recevoir qu'on soit à l'agonie.

2. Avoir grand soin que les malades la reçoivent de bonne-heure.

3. Pour le Mariage. Ne nous y engager légèrement, & s'instruire de tout ce qui concerne ce Sacrement.

De l'Ordre.

LEÇON VI.

Qu'est-ce que l'Ordre ?

C'est vn Sacrement institué de nostre Seigneur, pour donner des ministres à son Eglise.

Combien y a-t-il d'Ordres ?

Sept, quatre mineurs , & trois majeurs, avant lesquels se donne la Tonsure.

Qu'est-ce que la Tonsure ?

C'est l'entrée à l'Estat Ecclesiastique, & vne preparation requise pour re-

cevoir le Sacrement de l'Ordre.

A quoy oblige la Tonsure ?

A porter les cheveux courts, la couronne sur la teste, & la soutanne.

Quelles dispositions faut-il pour estre tonsuré ?

Il faut auoir la volonté d'estre d'Eglise, sçauoir lire & escrire, & son Catechisme ; mais le principal est la vocation de Dieu.

Les parens font-ils bien, qui ne font tonsurer leurs enfans que pour auoir des benefices ?

Non, & ils offensent Dieu griue-ment.

Quels fruits faut-il retirer, &c.

1. Pour les peres & meres, qu'ils auissent comme ils destinent leurs enfans pour la Tonsure, & les Ordres.

2. Porter vn tres-grand respect aux Prestres à cause du caractere qu'ils portent.

3. Pour ceux qui ont receu les Saints Ordres, mener vne vie digne du caractere qu'ils ont receus.



De la Justice Chrestienne.

LEÇON VII.

Combien y a-t-il de parties de la Justice Chrestienne?

Deux, fuir le peché, & embrasser la vertu.

Qu'est-ce que peché?

C'est vne pensée, parole, ou œuvre faite ou omise volontairement contre la Loy de Dieu.

Combien y a-t-il de sortes de pechez?

Deux. 1. L'originel que nous apportons venant au monde. 2. L'actuel que nous commettons nous-mêmes ayans l'usage de raison.

Combien y a-t-il de sortes de pechez actuels?

Deux, mortel, & veniel.

Qu'est-ce que vertu?

C'est vne qualité qui se reçoit en l'ame, qui rend l'homme bon moralement, & luy fait operer les bonnes œuvres avec facilité.

Combien y a-t-il de sortes de vertus?

Il y en a que l'on appelle Theolo-


gales , qui sont la Foy , l'Esperance , & la Charité ; les autres Cardinales , qui sont Prudence , Iustice , Force , Temperance.

Combien y a-t-il d'œuvres de miséricorde ?

De deux sortes : Corporelles, qui sont sept. 1. Donner à manger à ceux qui ont faim. 2. Donner à boire à ceux qui ont soif. 3. Vestir les nuds. 4. Visiter les malades & prisonniers. 5. Loger les pelerins. 6. Racheter les captifs. 7. Ensevelir les morts.

Et les Spirituelles qui sont aussi sept. 1. Enseigner les igno-rans. 2. Corriger les defaillans. 3. Donner bon conseil à ceux qui en ont besoin. 4. Consoler les desolez. 5. Porter patiemment les iniures. 6. Pardonner à ceux qui nous ont offensez. 7. Prier pour les vivans & trespassez , & pour ceux qui nous persecutent.





DES FESTES

PRINCIPALES DE L'ANNEE.

POUR LE TEMPS
DES ADVENTS.



Q'est-ce que les Advents?

C'est vn temps institué de l'Eglise pour se disposer à la Feste de Noël, & remercier nostre Seigneur du benefice de son Incarnation, & de son aduenement au monde.

Combien distingue-t-on d'aduenemens de nostre Seigneur?

L'Eglise en reconnoist trois, le premier qui s'est fait au iour de sa Natiuité, que nous appellons le iour de Noël. Le second, qui se fera au iour du iugement dernier. Le troisiéme, qui se fait tous les iours dans les ames par la grace.

Est-ce vn grand bien pour nous, que le Fils de Dieu se soit incarné, & soit venu au monde?

Ouy, car sans cela nous estions tous perdus.

Que faut-il faire pour bien passer le temps des Aduents ?

Deux choses principales.

Quelle est la premiere ?

C'est de reciter tous les iours de l'Aduent avec deuotion l'*Angelus*, au matin, à midy, & au soir, à dessein de remercier nostre Seigneur de s'estre fait homme pour nous.

Quelle est la seconde ?

C'est de se tenir plus retiré d'icy à Noël, se priuer des plaisirs, & des compagnies mondaines, estre plus assidus à la Parroisse, & au Catechisme, & venir plus souuent à la Messe.

Quels fruits deuons-nous recueillir d'icy ?

1. Se resoudre de pratiquer ces deux moyens pour bien passer les Aduents.
2. De craindre & d'aimer tout ensemble nostre Seigneur IESVS-CHRIST, que l'Eglise nous propose en ce temps, tout seuer, & tout bon dans son premier, & son dernier aduenement.



DE S. NICOLAS.

Quelle feste solemnise l'Eglise N. prochain ?

C'est la Feste du grand S. Nicolas.
Ne nous est-ce pas un grand bon-heur de solemniser la Feste de Saint Nicolas ?

Ouy, pour deux raisons principales.
1. A cause de son merite, & grande veneration en laquelle il est en tout l'Eglise. 2. Pource qu'il est vn modele tres-parfait de toutes vertus.

Pourriez-vous nous en rapporter quelques-unes en particulier ?

Parmy le grand nombre des vertus de Saint Nicolas, i'en remarque trois qui sont les plus fortables à nostre âge, & condition, dont la premiere est la sobriété, la seconde la promptitude au Service diuin, la troisieme la grande affection qu'il portoit à la chasteté.

Comment imitez-vous S. Nicolas en sa sobriété ?

Ce sera en ne mangeant point à toute heure, en ne nous rendant point im-

portuns pour auoir beaucoup à manger, & mesme à ieusner quelquefois pour nous y accoustumer de bonne heure.

Et en sa diligence au Service diuin, comme le pouuez-vous imiter?

Ce sera en nous rendant des premiers de nous-mesmes, & sans contrainte à tout le Service Parroissial, pour y adorer, remercier Dieu, & chanter ses loüanges.

Que ferez-vous pour ressembler à Saint Nicolas en sa pureté?

Ce sera en nous esloignant de tout ce qui est ennemy de cette vertu, comme sont l'oisiueté, les chansons deshonestes, danses, & hantises de nos compagnons ou compagnes que nous connoistrions estre suiets à tels vices.

DE LA CONCEPTION.

Q*uelle feste auons-nous N. prochain?*
C'est la Feste de la Conception Immaculée de Nostre-Dame.

Pourquoy appelez-vous la Conception de Nostre-Dame, Immaculée?

Parce qu'elle seule d'entre les pures creatures a esté conceuë sans peché originel.

Qu'est-ce que peché originel ?

C'est celuy que nous tirons de nostre premier pere , avec lequel nous naissons , & qui ne s'efface que par le Baptême.

Quels sont les effets du peché originel ?

Le premier , c'est de nous rendre esclaves du Diable.

Le deuxiême , nous assuiettir à toutes les incommoditez que nous ressentons , comme la faim , la soif , les maladies , & la mort.

Le troisiême , nous rendre la vertu tres-difficile , & nous donner au contraire vne pente , & vne facilité grande au mal.

Combien y a-t-il eu de Saints qui ont esté conceus sans peché originel ?

Il n'y a iamais eu que nostre Seigneur , & la Vierge , en qui le Diable ne peut pas se vanter d'auoir iamais eu aucune part.

Que faut-il faire pour tirer profit de cette Feste ?

Trois choses : la premiere de porter grand respect , & honneur à la Sainte Vierge , faisant la reuerence au Saint Noin de Marie , & n'en parlant qu'avec respect.

La deuxiême , auoir recours à elle en nos besoins , nous offrir tous les iours à son seruice.

La troisiême , c'est de hair & detester le peché dont elle a esté entiere-ment exempte , & qui luy est si desagreable.

DE LA-FESTE DE NOEL.

Q' est-ce que la Feste de Noël ?

C'est le iour auquel la Sainte Vierge enfanta nostre Seigneur IESVS-CHRIST.

Dites-nous les particularitez de cet heureux enfantement ?

La Sainte Vierge estant prestee de mettre au monde son Fils , fut obligée par le commandement de l'Empereur , d'aller avec Saint Ioseph , de Nazaret en Bethleem : là où comme elle fut arriuée ,

cherchant par toute la ville où se loger, & personne ne les voulant receuoir, elle fut contrainte de se retirer dans vne estable ruinée, & tout à iour, & là enfanter le Sauueur du monde, en plein minuit en la saison où nous sommes, qu'elle mit dans vne petite creche, n'ayant rien pour le placer plus honnestement, ni commodement.

Nostre Seigneur ne pouuoit-il pas venir au monde en un âge parfait, & ainsi éviter toutes ces incommoditez?

Ouy, il le pouuoit, mais il a voulu s'y assuiettir, & se faire petit enfant pour se faire aimer dauantage.

En quelle maniere la Sainte Vierge a-t-elle enfanté nostre Seigneur I E S V S - C H R I S T.

Sans aucune douleur, ni preiudice de sa Virginité, tout ainsi que le Soleil passe au trauers d'une vitre sans la rompre.

Que fait le petit I E S V S dans cette creche?

Il est là comme vn petit Docteur dans sa chaire, où il nous fait leçon de toutes les vertus, & attend là que nous

luy allions rendre nos deuoirs.

Quelles sont les vertus principales qu'il nous enseigne ?

La pauureté, l'humilité, & la souffrance.

Comment le pouuons-nous imiter en ces vertus ?

Nous l'imiterons dans sa pauureté, éuitant toutes les superfluités dans nos habits, & ne méprisant pas les pauvres. Dans son humilité, en obeïssant à nos parens, nos maîtres, & maîtresses. Dans les souffrances, endurent les incommodités du froid pour venir au Service.

Quelle preparation denons-nous apporter à cette Feste ?

1. Vn grand desir de receuoir nostre Seigneur, pour luy faire meilleur accueil que ne firent pas les Iuifs.

2. Vne grande pureté que l'on doit procurer par vne bonne confession.

DE LA CIRCONCISION.

Quelle feste auons-nous N. prochain ?

La Feste de la Circoncision, c'est à dire le iour que nostre Seigneur fut

circoncis, & appelé I E S V S.

Qu'appellez-vous Circoncision ?

C'estoit vn Sacrement de l'ancienne Loy qui effaçoit le peché originel, auquel nostre Seigneur n'estoit nullement obligé, n'estant pas du nombre des pecheurs, pour qui seuls ce Sacrement estoit institué.

Pourquoy donc pensez-vous que nostre Seigneur voulut subir la Loy de la Circoncision qui estoit si douloureuse, & où s'épanchoit desia du Sang ?

Pour trois raisons principales.

1. Pour nous monstrier qu'il n'estoit venu au monde que pour souffrir, & donner son sang pour nous.

2. Pour confondre les hommes, lesquels estans pecheurs, ne veulent pas paroistre tels.

3. Afin que par son exemple nous apprissions au moins à obeïr à ses Commandemens, aux choses faciles, & difficiles.

On vient de dire que ce iour mesme nostre Seigneur auoit esté nommé I E S V S.

Dites-nous que signifie ce Nom de I E S V S.

Ce nom signifie Sauueur, ou Redempteur, parce que nostre Seigneur nous a rachetez du peché, & de l'Enfer.

Ce nom est-il bien digne d'honneur & de respect ?

On ne scauroit iamais luy en porter assez, puisque tout fleschit le genouil, au Ciel, en la terre, & aux Enfers, à la prononciation de ce beau Nom.

Quels sont les moyens de bien celebrer cette Feste ?

Trois principaux. 1. Nous mettant à genoux aux pieds de la creche, remercier le petit Iesus de tous les biens receus de luy l'année passée.

2. Luy demander pardon des pechez commis en icelle.

3. Nous offrir tout à luy, & tout ce que nous auons, protestant de iamais ne l'offenser moyennant sa grace.

DE L'EPIPHANIE.

D'Où vient que N. prochain l'on fait si grande Feste ?

C'est pource qu'en ce iour nous fai-

sons memoire de trois grands mysteres en l'Eglise ; qui sont l'adoration des Rois, le Baptisme de nostre Seigneur au Iordain par Saint Iean, & son premier miracle en Cana de Galilée.

Quel interest auons-nous à l'adoration des Rois, pour en faire si grande feste ?

C'est que le iour qu'ils ont esté adorer nostre Seigneur, les Gentils dont nous sommes issus ont esté admis au giron de l'Eglise, & I E S U S- C H R I S T qui sembloit n'estre venu que pour les Iuifs, nous a receus en la personne de ces Rois, à sa connoissance, & à son seruice, & fait participans des fruits de sa naissance.

Comment les Rois furent-ils auertis de la naissance de nostre Seigneur ?

Par vne estoile qui leur apparut, & qui les conduisit depuis leur pais iusques en Bethleem, qui estoit distant de deux cens lieues.

Qui est-ce qui alla encore adorer nostre Seigneur avec les Rois ?

Personne, non pas mesme les Iuifs qui enseignoient aux autres où il estoit né, & qui en estoient tout proche.

*Que firent ces Rois quand ils furent
arrivés ?*

Ayant reconnu par vne lumiere plus
éclatante que ietta l'estoile, quand el-
le fut arrivée au dessus de l'estable,
que c'estoit là où estoit celuy qu'ils cher-
choient, ils entrèrent dedans avec tout
respect, & sans que rien les offensast
dans cette estable, ils adorèrent, pro-
sternez en terre le petit I E S V S entre
les bras de sa Sainte Mere, & luy fi-
rent chacun vn present d'Or, de Myrrhe,
& d'Encens.

*Que faut-il faire pour profiter de cette
Feste ?*

1. Euites les excès qui se font d'ordi-
naire la veille des Rois, que le Diable
a introduit parmy les Chrestiens pour
profaner la Feste.

2. Estre bien diligent à leur exem-
ple de venir à l'Eglise, pour remercier
nostre Seigneur de nostre vocation à la
Foy.

3. Luy faire offre de nous-mesmes,
& tout ce que nous auons.



DE LA PURIFICATION.

Quelle feste auons-nous N. prochain?
 La Feste de la Chandeleur, ou
 de la Purification Nostre-Dame, au-
 trement la Feste du Rencontre.

*Pourquoy l'appelle-t-on la Purification
 nostre-Dame?*

Parce que la Vierge à pareil iour
 alla au Temple de Ierusalem pour obeir
 à la Loy de Moyse, quoy qu'elle n'y fust
 pas obligée, pour presenter à Dieu
 le petit I E S V S son Fils.

*Pourquoy l'appelle-t-on la Feste du Ren-
 contre?*

A cause du bon-heur qui arriua à S.
 Simeon, de voir nostre Seigneur au
 Temple, après l'auoir si long-temps de-
 siré.

*Que faut-il faire pour bien celebrer cet-
 te Feste?*

Il faut premierement purifier la con-
 science par vne bonne confession.

2. Assister à la Procession de ce iour avec
 vn cierge à la main, & faire vne re-
 solution d'éuiter toutes les mauuaises
 com-

compagnies, les jeux, les mascarades & ce temps de Carnauval où nous allons entrer.

Quelle instruction doivent tirer en particulier les enfans de la premiere Communion, de la Feste de la Chandeleur?

C'est de considerer les dispositions qui se trouuent en Saint Simeon, qui receut aujourdhuy nostre Seigneur entre ses bras, pour nous rendre dignes de le receuoir dignement à son exemple à la Feste de Pasques.

Quelles dispositions remarquez-vous en Saint Simeon?

L'Euangile nous dit qu'il estoit vieillard, iuste, remply du Saint Esprit, & craignant Dieu.

Qu'est-ce que signifient toutes ces qualitez de vieillard, iuste, &c.

1. Le titre de vieillard nous monstre que nous deuons renoncer aux niaiseries & puerilitez de l'enfance.

2. La qualité de iuste, que nous deuons de bonne heure nous mettre en la grace de Dieu par vne bonne confession generale.

3. Il faut estre craignant Dieu, c'est à

dire, que l'on se doit garder de tomber en les premiers pechez.

Et enfin remply du Saint Esprit, c'est à dire, plein de l'amour de Dieu, & du prochain, qui est la principale disposition à la premiere Communion.

DE LA QUINQUAGESIME ou Sexagesime.

D'Où vient que depuis quelque temps on a retranché les chants de ioye de l'Eglise, comme les Alleluia, Gloria in excelsis, Te Deum, & que l'on a changé d'ornemens?

Cela se fait pour deux raisons principales.

Quelle est la premiere?

C'est pour apprendre aux Chrestiens, que dans ces iours icy, ils doivent retrancher les ioyes, les festins, les mascarades, & autres recreations insolentes, pour pleurer comme de bons enfans, avec leur mere, qui est la sainte Eglise, la mort & Passion de nostre Sauveur.

Que'le est la seconde raison?

C'est pour nous disposer à bien pas-

ser le saint temps de Carefme.

D'où vient donc qu'en ce temps icy, plus qu'en tout autre, les diuertissemens, les vanitez, les bonnes cheres sont plus en usage?

C'est vne inuention du demon, pour contrarier les desseins de l'Eglise, pour empescher le fruit du ieusne, & de toutes les autres bonnes œuures, que les Chrestiens pourroient faire en Carefme.

Que faut-il faire pour se conformer aux desseins de l'Eglise en ce temps de Carnaval?

Il faut premierement aux lieux où se font les prieres de quarante-heures s'y rendre volontiers, taschant de faire compagnie à nostre Seigneur, tandis que la pluspart des hommes l'abandonnent.

2. Il faut se retirer des ieux, des mascarades, des danses, des bonnes cheres, & autres recreations insolentes.

Et enfin, si l'on se trouue par necessité en compagnie, s'y comporter avec vne modestie, & vne retenue plus grande qu'en d'autre temps.

A qui pouuons-nous comparer ces mascarades, & ces coureurs de nuit?

Aux Juifs, & aux soldats qui dépouillèrent nostre Seigneur, qui luy bandèrent les yeux, & luy firent mille outrages pendant la nuit de sa Passion.

DU CARESME.

P*ourquoy l'Eglise a-t-elle institué le Carême ?*

1. Pour honorer la retraite du Fils de Dieu, qui ieusna quarante iours dans le desert.

2. Pour faire penitence de nos pechez par les ieusnes, & autres mortifications.

3. Pour nous disposer à la Feste de Pasques.

D'où vient que l'on couvre les images en Carême ?

Pour nous monstrier que le peché nous separe de Dieu, & de la compagnie des Saints.

Comment les Chrestiens doivent-ils passer le temps de Carême ?

En ieusnes, en prieres, en aumosnes plus grandes qu'en vn autre temps, s'éloignant des compagnies, s'humiliant à la veüe de leurs pechez, qui ont causé

la mort de nostre Seigneur.

Qui sont ceux qui sont obligez aux ieusnes?

Toutes personnes qui ont atteint l'âge de vingt & vn an, s'ils n'en sont legitimelement dispensez.

Que faut-il faire pour rendre les ieusnes, & autres bonnes œuvres agreables à Dieu, & satisfaire pour nos pechez?

Il faut qu'elles soient faites en estat de grace, sans quoy ce sont des œuvres inutiles à salut.

Mais quelle penitence feront les enfans qui ont offensé Dieu, & qui ne peuvent ieusner?

Au lieu du ieusne, & de l'aumosne, ils iront à confesse dès la premiere semaine de Carême.

2. Ils prieront Dieu plus qu'à l'ordinaire.

3. Ils se priveront d'une petite partie de leur desieuner ou goustier, pour le donner aux pauvres, s'abstiendront de de tous les jeux puerils, & des sortises qu'ils faisoient auparavant.

Quels fruits devons-nous recueillir d'icy?

C'est de se refoudre à toutes ces pratiques, & pour sanctifier toutes les œuvres, aller au plustost à confesse, sans attendre à la Semaine Sainte.

DU DIMANCHE des Rameaux.

Quelle solemnité auons-nous en l'Eglise Dimanche prochain?

Le Dimanche des Rameaux, autrement dit Pasques Fleuries.

Pourquoy l'appelle-t-on le Dimanche des Rameaux?

A cause de la Procession qui se fait en ce iour en memoire de l'entrée triomphante de nostre Seigneur en Ierusalem, six iours auant la Passion, où chacun porte vn rameau d'olurier, ou vne palme à la main.

Qui est-ce qui alla au deuant de nostre Seigneur en cette celebre entrée?

Le simple peuple, & les petits enfans seulement.

D'où vient que les grands de la ville de Ierusalem, & les Docteurs n'y vinrent pas?

Pource qu'ils estimoient que cela estoit au dessous d'eux.

Qu'est-ce que nous representent ces Rameaux ?

Ils marquent la victoire que nous auons deu emporter sur le monde, le Diable, & la chair par nos bonnes œuvres durant le Carême.

Que devons-nous faire à cette solennité ?

Il faut premièrement n'auoir point de peché, car autrement nous serions indignes de porter le Rameau en signe de victoire, puisque nous serions esclaves du Demon.

2. Il faut imiter les enfans en l'honneur & amour qu'ils témoignèrent à nostre Seigneur, lors de son entrée triomphante, pour avec ces deux vertus meriter qu'il entre ioyeux & triomphant en nous par la Communion Paschale.

3. Après auoir assisté à la Procension, il faut garder avec reuerence le Rameau beny qu'on y aura porté, & le mettre en son Oratoire iusques à l'année prochaine, apportant à la Sacristie celui de l'année passée.

DE LA SEMAINE SAINTE.

Comment appelle-t-on la semaine où nous allons entrer ?

La grande semaine, ou la semaine peineuse, ou la semaine sainte.

Pourquoy est-elle ainsi appelée ?

A cause du grand mystere de nostre Redemption que nostre Seigneur y a operé, & des grands travaux qu'il a endurez.

Qu'est-il arriué le Mercredi ?

Nostre Seigneur ce iour-là fut vendu aux Iuifs par Iudas son disciple, la somme de trente deniers.

Qu'est-ce qui fut fait le Ieudy ?

Nostre Seigneur sur le soir mangea l'Agneau Paschal avec ses Apostres, selon la coustume des Iuifs, puis leur lava les pieds, & institua le tres-Saint Sacrement.

Quand est-ce que nostre Seigneur fut livré entre les mains des Iuifs ?

La nuit du Ieudy au Vendredy, que Iudas qui venoit de faire sa premiere Communion, entrant dans le lardin des Oliues le baïsa, pour donner signe aux

soldats qu'il auoit amenez, de se saisir de **IESVS-CHRIST**, de le lier & garrotter, comme ils firent.

Qu'est-ce que nostre Seigneur souffrit cette nuit-là ?

Il fut conduit comme vn criminel deuant Anne, & Caïphe, qui estoient les Princes des Prestres : Saint Pierre le renia trois fois : ses Disciples s'enfuirent : & toute la nuit estant laissé à la discretion des soldats, ils luy firent souffrir toute les indignitez possibles, blasphemant son saint Nom, luy donnant des soufflets, & se moquant de luy.

Qu'arriva-t-il le Vendredy ?

Les Iuifs dès le grand matin le menerent à Pilate, & de là à Herodes, où il fut traité comme vn fol, puis estant encore renuoyé d'Herodes à Pilate, il fut condamné au fouiet : ce que les soldats executerent avec tant de cruauté, qu'ils luy en donnerent plus de six mil coups.

Après cela que firent-ils ?

Les soldats le reuestirent d'une vieille casaque rouge, luy mirent vne couronne d'espines en teste, & vn roseau à la main, le saluant par derision, comme vn Roy

de theatre : mais les Juifs n'estant point encore satisfaits de le voir en cet estat, obligerent Pilate de le condamner à la mort, comme il fit pour condescendre à leur mauuais dessein.

Après que nostre Seigneur eut esté ainsi condamné, que firent les Juifs ?

Ils luy chargerent vne grosse Croix de quinze pieds sur les espauls, & le traînerent ainsi au haut de la Montagne de Caluaire, où l'ayant dépouillé tout nud, ils l'attachèrent à cette Croix, entre deux infames larrons, où après auoir demeuré trois heures il y mourut.

Que fit-on à nostre Seigneur après sa mort ?

Vn soldat vint luy percer le costé d'une lance, d'où sortit du sang, & de l'eau, & Ioseph d'Arimathie le iour mesme sur les Vespres avec Nicodeme, l'ayant descendu de la Croix, l'enseuclirent honorablement dans vn beau linge blanc, & le mirent dans vn tombeau de pierre tout neuf.

Que fait-on en l'Eglise le Samedi Saint ?

La ceremonie du cierge Paschal, & la benediction des Fonts : ceremonies qui

sont toutes pleines de myſteres.

Que devons-nous faire pour bien paſſer cette ſemaine ?

1. Jeſner plus exactement.
2. Nous priver des compagnies.
3. Aller à confeſſe au pluſtoſt, ſi déjà nous n'y auons eſté.
4. Aſſiſter aux Tenebres, & à tout le ſervice des trois iours, venir adorer la Croix le Vendredy Saint, & compatir à noſtre Seigneur, endurant quelque choſe pour l'amour de luy.

POVR LE SAINT IOVR de Paſques.

Q*uelle Feſte auons-nous auourd'huy en l'Egliſe ?*

C'eſt la plus grande Feſte de toute l'année, que nous appellons le iour de Paſques, ou le iour de la Reſurrection de noſtre Seigneur, laquelle pour marque de ſon merite continuë encore demain, & après demain.

Qu'appellez-vous Reſurrection ?

C'eſt la reünion du corps avec l'ame, qui auoient eſté ſeparez par la mort.

Quel est le dessein de l'Eglise à cette Feste?

1. C'est d'honorer le mystere de la Resurrection glorieuse du Fils de Dieu.

2. D'obliger les Chrestiens de ressusciter spirituellement à la grace à l'exemple de nostre Seigneur IESVS-CHRIST, ce qui se fait par vne bonne Confession, & Communion.

Comment pourra-t-on connoistre si on est veritablement ressuscité avec IESVS-CHRIST à cette Feste de Pasques?

Il y en a trois marques principales: La premiere, si dans la confession que l'on a faite, l'on a renoncé, non seulement à tous les pechez dont on s'est confessé, mais encore à toutes les occasions & compagnies dangereuses, & si on est dans la resolution de mourir plustost mil fois, que de iamaïs offenser Dieu.

Quelle est la seconde marque?

C'est de desirer & rechercher les choses du Ciel, & mépriser tout ce qui est icy-bas, les grandeurs, les braueries, & les plaisirs du monde.

Quelle est la troisieme?

C'est d'auoir du goust pour les choses

divines, c'est à dire, se plaire à parler ou à entendre parler de Dieu, faire estat des exercices de pieté, comme de la priere, de l'assistance au Service Parroissial, & aux Catechismes.

Que devons-nous esperer si nous celebrons bien cette Feste, en renonçant de cette maniere aux pechez, & soupirans après les biens eternels?

Nous devons esperer que nous ressusciterons vn iour bien-heureux à l'imitation de nostre Seigneur, & que nos corps, & nos ames seront douez des mesmes qualitez glorieuses, dont il est reuestu à present dans le Ciel.

DE L'ANNONCIATION.

Quelle feste auons-nous N. prochain?
La Feste de l'Annonciation de la Vierge, & de l'Incarnation du Fils de Dieu, nostre Seigneur IESVS-CHRIST.

Pourquoy l'appelle-t-on l'Annonciation?

Parce que c'est le iour auquel l'Ange vint annoncer à la Vierge qu'elle seroit Mere de Dieu.

Estant Mere de Dieu, a-t-elle cessé d'estre Vierge?

Non, elle est, & sera tousiours Vierge par vn miracle inouïy.

Pourquoy appelle-t-on cette Feste du nom d'Incarnation?

Parce que c'est le iour auquel le Fils de Dieu s'est incarné, c'est à dire, qu'il a pris vn corps, & vne ame comme nous.

Qui a operé ce grand mystere?

C'a esté le Saint Esprit qui a formé vn corps du plus pur sang de la Vierge, & puis y a ioint vne ame comme les nôtres.

Le Fils de Dieu se faisant homme a-t-il cessé d'estre Dieu?

Non, mais il est demeuré Dieu & homme tout ensemble.

Estoit-il necessaire que le Fils de Dieu se fist homme?

Ouy, pour nous racheter.

Faites vn acte de Foy sur le mystere de l'Incarnation?

Mon Dieu, ie croy fermement que vostre Fils nostre Seigneur I E S U S-CHRIST, seconde personne de la Sainte Trinité, a pris vn corps, & vne ame

comme nous au ventre de la Sainte Vierge Marie, parce que vous l'avez dit.

Quels fruits devons nous tirer de cette Feste ?

1. Reconnoître la charité de nostre Seigneur, de se reueſtir ainſi de nostre corps, & de nos miſeres.

2. Porter un honneur ſingulier à la Sainte Vierge, qui a eſté choiſie ſpecialement pour eſtre la Mere de Dieu.

DES ROGATIONS.

Pourquoy les Rogations ont-elles eſté inſtituées ?

Pour deux raiſons principales. 1. Pour deſtourner la colere de Dieu ordinairement irrité contre ſon peuple en cette ſaiſon.

2. Pour le prier qu'il veuille donner ſa benediction aux fruits de la terre, qui ſont encore tendres, & ſuiets à beaucoup d'accidens.

Mais d'où vient qu'en cette ſaiſon Dieu fait ordinairement paroître ſa colere, nonobſtant les ieufnes de Careſme, & les Communions Paſchales.

C'est que la plupart n'en ont pas fait bon usage, s'approchant de la Sainte Communion en estat de peché mortel.

Est-on obligé d'assister à ces Processions?

Ouy, & personne ne s'en sçauroit exempter, sinon ceux qui sont malades, ou legitiment empeschés, ou qui ne sont jamais tombez dans le peché.

Que devons-nous donc faire pour s'acquiescer de cette obligation?

Deux choses, premierement y assister dans la pensée que nous sommes coupables de cette colere de Dieu.

2. Y assister en habit simple & modeste, sans causer, mais priant Dieu continuellement.

Pour ceux & celles qui n'y peuvent assister, ils doiuent selon leur possible reciter les Litanies des Saints, ou autres prieres selon l'intention de l'Eglise, & garder l'abstinence.

DE L'ASCENSION.

Quelle feste auons-nous lundy prochain?

La Feste de l'Ascension, c'est à dire, le iour que nostre Seigneur est monté aux Cieux.

Y est-il monté en tant que Dieu ?

Non, parce que Dieu est present par tout, mais il y est monté en corps, & en ame par sa propre vertu.

Pourquoy nostre Seigneur est-il monté au Ciel.

Parce que c'est la demeure des corps glorieux, pour nous y preparer nostre place, si nous viuons bien, & nous y seruir d'Aduocat.

Quel rang tient nostre Seigneur IESVS-CHRIST dans le Ciel ?

Il est à la droite de Dieu le Pere Tout-puissant au dessus de toutes les creatures.

Quelles preparations deuons-nous faire pour une si grande Feste ?

C'est de nous ioindre à l'intention de l'Eglise dans ces trois iours de Rogations, & de garder estroitement l'abstinence qu'elle nous enioint.

Et assister aux Processions chaque iour avec grande modestie.

Quels fruits deuons-nous tirer de cette Feste ?

1. Nous animer à vn grand desir de
suiure nostre Seigneur dans le Ciel.
 2. Mépriser tout ce qui est icy-bas en
comparaison des biens que nous atten-
dons là haut.
 3. Trauailer pour les acquerir.
-

DE LA PENTECOSTE.

Quelle Feste solemnise l'Eglise Di-
manche prochain?

La Feste de la Pentecoste : c'est à dire,
le iour auquel nostre Seigneur enuoya
son Saint Esprit à son Eglise.

Qu'est-ce que le Saint Esprit?

La troisieme personne de la Sainte
Trinite, qui procede du Pere, & du Fils,
& qui est vn mesme Dieu avec eux.

*Pourquoy nostre Seigneur a-t-il enuoyé
le Saint Esprit à l'Eglise?*

1. Pour la gouuernér, & la conduire
infailliblement, à ce qu'elle ne puisse
iamais faillir.

2. Pour demeurer en ses membres
qui sont les iustes, comme dans ces pro-
pres temples.

Que fait le Saint Esprit en une ame?

1. Il la sanctifie par sa grace.
2. Il la conduit en ses actions.
3. Il la fortifie en ses tentations.
4. Il la console dans ses afflictions.

Quels estoient les personnes qui composoient l'Eglise de ce temps-là ?

C'estoit la Sainte Vierge, les Apostres, & les Disciples, sur lesquels le S. Esprit descendit en forme de langue de feu, après avoir excité vn grand bruit, comme d'un vent violent.

Quelle preparation devons-nous apporter à cette Feste ?

Il faut premierement se retirer à l'exemple des Apostres, pour vacquer à la priere plus frequente.

2. Il faut estre sans peché mortel, en estat de grace, & estre vuide de l'esprit du monde.

Quels fruits devons-nous recueillir d'icy ?

1. Remercier nostre Seigneur qui nous a merité ce precieux don, & qui daigne nous le communiquer.

2. Se donner bien de garde de chasser le Saint Esprit de nos ames, ni mesme le contrister par aucun peché ou affection déreglée.

DE LA SAINTE TRINITE.

Q' est-ce que la Sainte Trinité?

Q C'est vn seul Dieu en trois personnes distinctes, le Pere, le Fils, & le Saint Esprit, aussi grandes, aussi puissantes, & aussi parfaites l'vne que l'autre.

Comment se peut-il faire que trois ne soient qu'un?

C'est vn mystere qu'il faut croire, & adorer, sans sçauoir comme il se fait.

N'y a-t-il rien dans les creatures qui nous exprime ce mystere.

Ouy, le Soleil dans la nature, l'homme, & l'ame raisonnable en font des exemples imparfaits.

Comment ces choses nous representent-elles la Sainte Trinité?

Dans le Soleil il y a le corps du Soleil, le rayon, & la lumiere, qui ne sont tous trois qu'un Soleil. L'homme n'estant qu'un, vit de trois vies différentes, de la vegetante, l'animale, & la raisonnable. L'ame qui n'est qu'une

la memoire, l'entendement, & la volonte.

Où sont ces trois personnes divines?

Elles sont par tout, par essence, par presence, & par puissance.

Faites un acte de Foy sur le mystere de la Sainte Trinite?

Mon Dieu, ie croy fermement que vous estes vn seul Dieu en trois personnes distinctes, le Pere, le Fils, & le S. Esprit, parce que vous l'avez dit.

Quel fruit devons-nous recueillir d'icy?

1. Faire souuent des actes de Foy de cette verité.

2. Considerer dans toutes nos actions, & en tous lieux que Dieu nous confide, & qu'il nous doit iuger.

POVR LE IOVR DE LA
Feste Dieu.

Quelle feste auons-nous Iendy prochain?

La feste du Saint Sacrement de l'An-

Qu'est-ce que le Saint Sacrement?

C'est le Corps, le Sang, l'Ame, & la

Diuinité de nostre Seigneur I E S U S-
C H R I S T sous les apparences du pain.

*Pourquoy l'Eglise a-t-elle institué une
procession si magnifique en ce iour?*

Pour deux raisons principales.

Quelle est la premiere?

Pour remercier nostre Seigneur d'a-
voir institué vn banquet si diuin pour
la nourriture de nos ames, & pour fer-
uir de Sacrifice perpetuel en l'Eglise.

Quelle est la seconde?

C'est pour reparer au possible les
outrages qu'il souffrit en sa Passion, &
les iniures qu'il reçoit encore tous les
iours par ceux qui le reçoient indi-
gnement.

*Comment fait-il assister à la Procession
de ce iour?*

Avec vn esprit recueilly, les yeux baï-
sez en toute modestie, vn cierge en la
main pour faire amende d'honneur, &
demander pardon comme des crimi-
nels.

*Est-ce assez pour témoigner à nostre Sei-
gneur la reconnoissance d'un si grand bien
fait, d'assister à la Procession, & au serui-
ce de ce iour?*

Non, mais encore pendant l'Octave il faut assister aux Saluts, & le visiter au moins vne fois le iour dans l'Eglise.

Quel fruit devons-nous recueillir d'icy ?

1. De croire fermement ce mystere, & en faire souuent des actes de foy, disant : Je croy fermement, mon Seigneur **I E S U S- C H R I S T**, que vous estes en corps, & en ame dans le Saint Sacrement de l'Autel.

2. Le remercier en toute humilité dans l'Eglise, & nous tenir en grand respect deuant luy.

POVR LE FEV DE LA

Saint Iean.

Q*U'est-ce qu'on appelle le feu de la Saint Iean ?*

C'est vne ceremonie sainte & Ecclesiastique, qui se fait en réioüissance de la Natiuité de Saint Iean Baptiste.

Pourquoy fait-on si grande réioüissance parmi les Chrestiens ce iour-là.

1. Parce que Saint Iean est le plus grand de tous les Saints.

2. Parce qu'il est né sans peché.

3. Parce qu'il a esté Precurſeur de noſtre Seigneur I E S U S- C H R I S T , c'eſt à dire, qu'il eſt venu nous l'annoncer, & nous le montrer au doigt.

Eſt-il bon d'aſſiſter à la Cereemonie du feu de Saint Jean ?

Ouy, c'eſt vne action bien Chreſtienne, pourueu que les profanations, & les ſuperſtitions en ſoient bannies.

Quelles ſont ces profanations, & ſuperſtitions ?

Danſer à l'entour du feu, ioüer, faire des feſtins, chanter des chanſons deshonneſtes, ietter des herbes pardeſſus le feu, en cueillir auant midy, ou à cœur ieun, en porter ſur ſoy, les conſeruer le long de l'année, garder des tiſons ou des charbons de feu, & ſemblables.

Que faut-il donc faire pour bien celebrer cette Feſte ?

Il faut ieufner la veille ſelon que l'Egliſe y oblige, aſſiſter à la ceremonie du feu, en chantant des Hymnes en l'honneur de Saint Jean, & taſcher d'imiter ſa vie.

Qu'imiterons-nous en la vie de Saint Jean Baptiſte ?

1. Le mépris qu'il a fait du monde, & de toutes les maximes, s'en estant retiré dès l'âge de trois ans.

2. La penitence qu'il a faite toute sa vie, sans qu'il en eust besoin.

DE L'ASSOMPTION

de Nostre-Dame.

Quelle Feste solemniseront-nous N. prochain?

Ce sera la Feste de l'Assomption Nostre-Dame, qui est la plus solennelle de toutes les festes qui se font à son honneur.

Monstrez-nous comment cette Feste est la plus solennelle?

C'est qu'en ce iour trois grands avantages sont arrivez à Nostre-Dame, qui meriteroient chacun vne feste particulière.

Dites-nous s'il vous plaist quels sont ces trois avantages?

Le premier est, que la Sainte Vierge ayant avec ardente affection demandé à nostre Seigneur de la retirer de ce monde, pour iouir avec luy de la gloire eter-

nelle, trepassa peu après en la compagnie de tous les Saints Apostres,

Dites le second ?

C'est que la Sainte Vierge estant trepassée, & son tres-chaste corps ayant esté mis avec grandes ceremonies dans le sepulcre, elle ressuscita, & monta glorieuse au Ciel.

Quel est le troisième ?

C'est que cette tres-humble Vierge ayant esté receuë triomphante de toute la Cour Celeste, elle a esté couronnée Reine du Ciel, & de la terre, & placée au dessus de tous les Esprits bienheureux, & des Anges.

Comment pouvons-nous passer cette Feste, & nous rendre agreables à cette Sainte Vierge ?

Ayant ieusné, & nous estant confessé la veille, nous remercierons Dieu, & nous réjouirons de ce qu'elle est si releuée, & si puissante dans le Ciel.

Quels avantages tirerons-nous du grand pouvoir qu'elle a dans le Ciel ?

Nous la prions de nous obtenir de nostre Seigneur la parfaite humilité en nos cœurs, la chasteté en nos corps, la

modestie en nos habits , & à la fin vne mort semblable à la sienne.

DE LA NATIVITE de Nostre Dame.

Quelle feste auons-nous N. prochain ?
La Natiuité miraculeuse de la
Sainte Vierge Marie.

*Qui estoient les parens de la Sainte
Vierge ?*

Saint Ioachim , & Sainte Anne , lesquels ayant souffert long-temps l'opprobre de la sterilité , enfin furent choisis de Dieu , pour mettre au monde la plus sainte , & la plus parfaite de toutes les creatures.

*Pourquoy nostre Seigneur a-t-il voulu
que sa Mere nasquist d'une mere sterile ?*

Afin que la Sainte Vierge fust vne fille de prieres , & de larmes , & que sa naissance fust plustost attribuée à la grace qu'à la nature.

2. Pour connoistre l'estime qu'il fait de la pauvreté.

*La feste de cette Sainte Vierge estant
si grande en ce Diocese , & en toute l'E-*

glise ; comment est-ce qu'elle est profanée par une foire qui dure la veille , & le iour à la porte de son Eglise , au grand scandale des gens de bien ?

Le Démon ialoux de l'honneur de cette Sainte Vierge , a introduit ce dérèglement.

Comment pouvons-nous honorer cette Reine du Ciel , & de la Terre au iour de sa naissance ?

1. En nous conioüissant avec elle des avantages que Dieu luy a donnez.

2. En luy portant vne singuliere deuotion.

3. Ayant en horreur la foire susdite, n'y achetant rien , & priant Dieu pour l'abolition de ce dérèglement.

Quel profit y a-t-il d'estre deuot à la Vierge ?

1. Elle prend vn soin particulier de ceux qui luy sont deuots , elle les preserve de plusieurs dangers , elle leur obtient la grace de ne mourir pas sans confession , elle les defend des tentations du Diable à l'heure de la mort , & se rend leur Aduocate à toute heure auprès de son Fils.

Qui nous fait esperer toutes ces grandes assistances ?

Le grand credit qu'elle a auprès de son Fils.

2. L'amour extrême qu'elle nous porte, & le grand desir qu'elle a de nostre salut.

DE S. DENYS.

Q*uelles sont les raisons qui nous obligent en qualité de Chrestiens d'honorer Saint Denys ?*

Trois raisons principales : premiere-
ment, parce que c'est nostre Pere spiri-
tuel.

2. A cause du soin particulier qu'il prend dans le Ciel de nous assister auprès de Dieu.

3. A cause des trauaux & persecutions qu'il a endurées pour nous annoncer l'Euangile.

Qu'est-ce que Saint Denys a enduré pour nous ?

Après auoir esté cruellement fouetté, brulé à petit feu sur vn gril, attaché à vne Croix, enfin finit sa vie avec ses

Compagnons sur la montagne de Montmartre.

Que demande de nous Saint Denys pour reconnoissance de tant de bien-faits ?

Premierement, c'est de le remercier d'auroir tant souffert à nostre occasion.

2. C'est de viure en bon Chrestien.

3. C'est de pratiquer mesme aux dépens de nostre vie, les maximes de l'Evangile qu'il nous a enseignées, enfin c'est de l'imiter en ses vertus.

Quelles sont les vertus que nous pouvons imiter en Saint Denys ?

Deux principales, son zele, & la patience.

DE LA TOUSSAINTS.

Pour quelles raisons l'Eglise a-t-elle institué la Feste de tous les Saints ?

1. Pour suppleer aux Festes que l'on ne peut celebrer pendant l'année.

2. Pour reparer les manquemens commis aux autres iours de festes par les abus & les profanations.

3. Pour nous donner du desir d'aller en Paradis, en nous proposant la gloire

que les Saints possèdent.

Qu'est-ce que le Paradis ?

C'est la demeure que Dieu a préparée à ceux qui auront bien vécu, pour les rendre bien-heureux dans toute l'éternité, que nous appellons autrement la vie, la gloire, & la félicité éternelle.

En quoy consiste le bon-heur de ceux qui sont en Purgatoire ?

En ce qu'ils sont exempts de toutes sortes de maux, & remplis de toutes sortes de biens, & en l'ame, & au corps.

En quoy gist la gloire, & le bon-heur de l'ame ?

En ce qu'elle voit & connoist parfaitement Dieu, & en luy tout ce qu'elle veut sçavoir, d'où naist vn amour, & vne ioye incroyable.

Quels sont les avantages du corps ?

Il y en a quatre principaux, la clarté, l'agilité, la subtilité, & l'impassibilité, qui sont accompagnez d'une satisfaction tres-parfaite de tous les sens.

Combien durera ce bon-heur ?

Autant que Dieu sera Dieu, c'est à dire, éternellement, sans crainte

en iamaïs décheoir.

Quel fruit devons-nous recueillir d'icy?

1. Penser souuent à ce sejour des bien-heureux qui nous attend, si nous nous en rendons dignes.

2. Nous animer de souffrir courageusement toutes les peines de cette vie, puisqu'il ne se peut acquerir par autre voye que par les souffrances.

POVR LA COMMEMORATION des trespassez du Purgatoire.

Q' est-ce que le Purgatoire?

C'est vn lieu plein de feu où sont enuoyées les ames de ceux qui meurent avec des pechez veniels, ou qui n'ont pas entierement satisfait en ce monde à la iustice de Dieu.

Combien grande est la peine du Purgatoire?

Saint Augustin dit, qu'elle est plus griefue que toutes les peines que l'on pourroit voir, penser, ou endurer en ce monde.

Pouuons-nous aider les ames qui sont en Purgatoire, & les soulager dans les

peines qu'elles endurent ?

Ouy, par le moyen des prieres, ieufnes, aumosnes, & principalement par le Saint Sacrifice de la Messe.

Y a-t-il grand merite de prier pour les trespasses ?

Ouy, premierement, parce que leurs peines sont excessiues, qu'ils ne se peuvent aider d'eux-mesmes, n'estant plus en estat de meriter..

2. Parce que les ames deliurées par nostre moyen, seront reconnoissantes, & prieront pour nous en Paradis.

Que deuons-nous faire pour ne point aller en Purgatoire ?

Prier, ieufner, exercer les œuures de misericorde, se confesser souuent, ouïr la Sainte Messe en toute reuerence, communier avec grande deuotion, gagner les Indulgences, & se garder des pechez veniels.

DE LA FESTE DE S. MARTIN.

Q*uelle feste auons-nous N. prochain ?*
La Feste du grand Saint Martin.

Quel est le dessein de l'Eglise dans l'institution de cette Feste ?

1. C'est pour remercier Dieu des graces qu'il luy a faites.

2. Pour nous porter à l'imitation de ses vertus.

3. Pour le prier d'interceder pour nous auprès de Dieu.

N'y a-t-il pas quelqu'autre raison particuliere, pourquoy cette Feste est celebrée si uniuerfellement par toute la France ?

Ouy, c'est pour faire reconnoistre aux François les obligations signalées qu'ils ont à la memoire de ce grand Saint.

Quelles sont les obligations que les François doivent à Saint Martin ?

La premiere, c'est d'auoir conuertý de son temps plusieurs Prouinces à la Foy de IESVS-CHRIST par ses travaux.

La deuxiême, d'auoir fait vne infinité de miracles en leur faueur pendant sa vie, & après sa mort. D'où vient que presque en tous les lieux de la France, il y a des Eglises dediées en son honneur.

La troisiême, c'est que de tout temps

les Rois de France l'ont reconnu pour vn des principaux protecteurs de leur Royaume, le Clergé pour vn des plus puillans appuis de la Religion. Et sa feste autrefois estoit si celebre, que pour s'y disposer on ieunoit plusieurs iours auparauant.

Ceux-là donc qui la veille de cette Feste passent vne partie de la nuit en beuuettes, & autres excès de bouche, honorent-ils S. Martin?

Tant s'en faut, ils luy font grande iniure, renouvelant en cela les façons de faire des Payens.

Que deuons-nous faire pour bien celebrer cette Feste?

1. Quitter toutes les compagnies qui pourroient nous porter aux excès, & les empescher autant qu'il est en nous.

2. Faire ce iour là mesme quelque petite mortification par esprit de Penitence.

3. Assister au seruice qui se fait en son honneur.

Quelles vertus deuons-nous imiter en ce Saint?

Il y en a trois principales. Sa pau-

pureté, sa sobriété, & sa charité vers les
pauvres.

DE SAINTE CATHERINE.

Quelle feste solemniserons-nous N.
prochain ?

C'est la Feste de la tant renommée
Vierge Sainte Catherine.

*Que considerez-vous de particulier en
cette grande Sainte ?*

Deux choses. La premiere, qu'elle est
Patronne des écoliers. La seconde,
qu'elle a esté durant sa vie douée de
graces bien signalées.

*Quelles sont les graces plus considera-
bles qu'elle ait receüe de Dieu ?*

La premiere a esté que nostre Sei-
gneur luy ayant apparu entre les bras
de sa Sainte Mere, luy donna vn Anneau
en signe de ce qu'il la prenoit pour son
épouse.

*Quelles sont les autres graces que Dieu
luy a fait ?*

Elle a esté si sçauante, & si fort en-
tenduë aux mysteres de nostre foy,
qu'elle a confondu la sagesse des Philo-

sophes payens, lesquels se sont conuertis à nostre Religion.

Que faut-il faire pour bien solemniser la Feste d'une si courageuse Martyre?

Deux choses particulièrement. La premiere, nous purger par vne confession qui soit faite dès la veille, afin qu'estant agreable à Dieu, & à Sainte Catherine, elle daigne prier pour nous.


La deuxieme, est de demander à Dieu de ressembler à cette grande Sainte nostre Patronne.

Que doivent faire les enfans du Catechisme pour luy estre semblables?

C'est en premier lieu de prier nostre Seigneur de vouloir estre l'espoux de nos ames, & luy iurer de nostre part vne fidelité inuiolable.

2. Auoir vn amour, & vne estime singuliere pour la virginité.

3. Se rendre plus assidus que iamais au Catechisme, afin de deuenir sçauans comme elle dans les mysteres de nostre Religion.



DE LA DEDICACE.

Quelle feste auons-nous N. prochain ?
 La Feste de la Dedicace ; c'est à dire, le iour auquel cette Eglise fut consacrée à Dieu sous l'invocation de saint N.

Pourquoy dans l'Eglise renouue'le-t-on tous les ans la memoire de la Dedicace ?

Pour trois raisons principales. La premiere, pour remercier Dieu de l'honneur qu'il nous fait de demeurer parmy nous dans nos Eglises.

2. Pour nous renouveler la memoire, & l'esprit de nostre Baptisme.

3. Pour nous remettre deuant les yeux le respect, & la reuerence que nous deuons porter aux lieux Saints, c'est à dire, aux Eglises qui sont appelées la maison de Dieu.

Pourquoy les Eglises sont-elles appellées la maison de Dieu, puis que Dieu est par tout ?

Parce qu'il y reside d'une façon particuliere, au moyen du Saint Sacrement qui y repose, & qu'il prend plaisir d'y

écouter nos prieres, & les exaucer plutôt qu'en vn autre lieu.

Que devons-nous donc faire pour entrer dans l'Eglise, & pour bien celebrer cette Feste ?

Deux choses.

Quelle est la premiere ?

C'est de porter dorenavant grand respect aux Eglises, n'y entrer jamais en estat de peché, qu'on n'ait volonté de s'en confesser, s'y comportant quand on y est avec grande modestie, y venant le plus souuent que nous pourrons, les saluant quand nous passons auprès, & demander pardon des irreuerences que nous y auons commises par le passé.

Quelle est la seconde ?

C'est de renouveler les promesses faites au Baptême, dont la Dedicace est comme anniuersaire, & se consacrer au seruice de Dieu tout de nouveau, detestant les pechez que nous auons commis contre la parole que nous y auons donnée.

DES PATRONS EN GENERAL.

Quelle feste auons-nous N. prochain?
 La Feste de S. N Patron de cette Eglise.

Que signifie ce mot de Patron ?

Il signifie Aduocat, Directeur, exemplaire, pour monstrier comme nos Saints Patrons nous font tous ces offices, nous monstrans le chemin qu'il faut tenir, prians Dieu pour nous dans le Ciel, & & nous donnans l'exemple par les actions saintes de leur vie.

N'y a-t-il pas d'autres Patrons que ceux de la Parroisse, sur laquelle on demeure ?

Ouy, nous appellons encore nos Patrons, ceux dont nous auons receu le nom au saint-baptesine, & ceux qui les premiers sont venus annoncer l'Euan-gile en nos Prouinces, à qui nous deuons aussi auoir singuliere deuotion.

Quels sont les devoirs que nous sommes obligez de rendre à nos Saints Patrons ?

Il y en a quatre, dont le premier est de les aimer & respecter beaucoup.

Quel est le second ?

C'est de recourir à eux dans toutes nos necessitez.

Quel est le troisieme ?

C'est de sanctifier le iour de leur festes, nous abstenans de toutes les promenades, ieux, festins, danses, & autres diuertissemens, pour vacquer au Service diuin, & nous rendre dignes par ce moyen de leurs intercessions.

Quel est le quatrieme ?

C'est de les imiter au plus près que nous pourrons.

Quelles sont les vertus que nous devons imiter en Saint N.

Il y en a plusieurs, mais les principales, & plus dignes de nostre imitation sont, &c.

POVR LA FESTE DE L'ANGE Gardien.

Des devoirs du Chrestien deuot vers
son Ange Gardien.

Q*uels sont les devoirs d'un bon Chrestien à son Ange Gardien ?*

Il y en a quatre principaux.

Quel est le premier ?

C'est de croire qu'il y a des Anges, qui sont des esprits Celestes, lesquels ont cela de particulier, d'estre commis à la garde des hommes.

Chaque homme a-t-il son Ange Gardien?

Ouy, & les méchans aussi bien que les bons; les lieux saints, comme les Eglises, les Autels, les villes & villages ont aussi chacun le leur.

Pourquoy Dieu a-t-il donné à chaque homme un Ange Gardien?

C'est pour le defendre, garder, enseigner, & guider en toutes ses voyes, comme vn pedagogue, tuteur, conducteur, & protecteur.

Quel est le second deuoir?

C'est de les honorer.

En quoy consiste l'honneur que nous devons rendre à nos Anges Gardiens?

1. C'est à les estimer beaucoup.
2. A nous garder de toute indecense en leur presence.
3. A ne passer aucun iour sans faire quelque priere à leur honneur.
4. A celebrer tous les ans trois iours à leur honneur, sçauoir est, le iour de

nostre naissance, le 1. d'Octobre, & le iour de Saint Michel.

Quel est le troisieme deuoir qu'il faut rendre à nos Anges Gardiens?

C'est d'imiter leurs vertus.

Quelles vertus pouuons-nous imiter en nos Anges Gardiens?

1. C'est la pureté que nous deuons conseruer en nos corps, & en nos ames.

2. La promptitude à accomplir les volontez de Dieu.

Quel est le quatrieme deuoir qu'il faut rendre à nos Anges Gardiens?

C'est d'auoir recours à eux dans nos besoins.

Pourquoy deuons-nous ainsi recourir à eux?

1. C'est qu'ils se tiennent honnorez quand confidemment nous auons recours à eux.

2. C'est qu'ils ne souhaitent rien tant que de nous aider en toutes choses, mais principalement auprès de Dieu.

Auons-nous obligation de rendre tous ces deuoirs à nos Anges Gardiens?

Ouy, à cause des seruices & bons offices qu'ils nous rendent tous les iours.

Quels sont ces services & bons offices ?

Il y en a neuf principaux : premierement ils nous accompagnent dès le berceau iusques au tombeau. 2. Ils nous consolent dans nos afflictions. 3. Ils nous exhortent à bien faire. 4. Ils guerissent nos maladies. 5. Ils nous conduisent dans nos voyages. 6. Ils nous reprennent de nos fautes, & quelquefois nous en chastient. 7. Ils nous instruisent. 8. Ils nous donnent des salutaires conseils. 9. Et enfin ils nous assistent en l'agonie, & après nostre mort nous conduisent au Ciel.

Quel fruit faut-il retirer de cette instruction ?

1. Ne passer aucun iour de nostre vie sans les saluer du moins deux fois le iour, sçauoir est le matin, & le soir, disant *Angele Dei*, &c.

2. Entrant en quelque Eglise, ville ou village, saluer les Anges Gardiens de ces lieux.

3. Quand nous serons en quelque affliction ou peine d'esprit, auoir recours à eux par la priere.



DE L'INVENTION OV Translation des Saintes Reliques.

Quelle feste celebre-t-on N.
C'est la translation de Relique
de S. N.

Faut-il honorer les Reliques des Saints?

Ouy, premierement, à raison du rapport qu'elles ont avec les Saints, notamment leurs corps qui ont esté le temple du Saint Esprit.

2. Parce que Dieu s'en sert pour faire plusieurs miracles.

Est-il permis de porter des Reliques?

Ouy, avec deux conditions : premierement, que l'on les ait receuës de personnes fidelles.

2. Que l'on viue de la vie des Saints.

Pourquoy celebre-t-on la feste des Reliques des Saints?

C'est premierement pour monstrier le tres-grand honneur que nous leur deuons.

2. Pour prier les Saints desquels nous auons les Reliques de nous assister.

3. Pour nous remettre en memoire

les bienfaits que nous auons receus d'eux.

Quels sont les abus qui se commettent ordinairement à l'égard des Saintes Reliques ?

1. Est de les tenir en des lieux indecens.

2. Les exposer deuant qu'elles soient reconnues & approuuées des superieurs.

3. Les laisser exposées continuellement sans honneur ni respect.

4. Les faire porter par des laïques reueſtus d'aubes, ou chapes aux Proceſſions publiques contre l'ordre de l'Eglise.

Quel fruit deuous-nous retirer de cette instruction ?

1. Porter vn grand honneur aux Saintes Reliques.

2. Quand nous en aurons, les conſeruer avec honneur & reuerence.

3. Inuoquer ſouuent les Saints à qui elles appartiennent, en nos neceſſitez.

DE L'AGNUS DEI.

E*st-ce superstition de porter des Agnus Dei au col , comme font les Catholiques ?*

Non , au contraire c'est vne chose fort sainte , & fort louïable.

Pourquoy cette ceremonie a-t-elle esté instituée ?

1. Pour abolir vne maudite coustume des Gentils , & Idolatres , qui portoient au col vne petite idole remplie de superstitions.

2. Afin que par cette marque les fideles peussent estre distinguez d'auec les infideles.

De quoy est composée la matiere de l'Agnus Dei.

De cire blanche , de baume , & de saint Chresme , le tout beny & consacré par le Pape le Ieudy Saint.

Est-il permis à toutes personnes de toucher l'Agnus Dei ?

Non , mais seulement à ceux qui ont pouuoir de toucher les choses sa-

créés , comme les Prestres, Diacres,
& Soufdiacres.

Doit-on faire grand cas des Agnus?

Ouy, tant à cause de la benediction
de nostre Saint Pere le Pape, qu'à cau-
se de leur vertu.

Quelle sont les vertus de l'Agnus Dei?

1. C'est de nous garder des orages &
tempestes.

2. De déliurer les meres qui sont en
travail d'enfant.

3. De nous preserver d'eau, de feu,
& du tonnerre.

4. D'effacer les pechez veniels. Enfin
nous servir de rempart contre les atta-
ques du Diable.

*A-t-on veu autrefois arriuer ces sor-
tes de biens par le moyen de l'Agnus
Dei?*

Ouy, ainsi que les Histoires nous en
font foy.

*Quels profits faut-il remporter de cette
instruction?*

1. Faire grande estime des *Agnus Dei*
à cause des grands biens qui nous en
reuiennent, & des vertus qu'ils con-
tiennent,

2. Faire

2. Faire nostre possible pour en auoir,
& les porter avec reuerence & deuotion.

3. Prendre garde de ne faire cas des *Agnus Dei* à cause de l'or & del'argent qui les enrichit, mais à cause des biens qu'ils contiennent.

DES INDVIGENCES.

Q *V'est-ce qu'Indulgence?*

C'est vne remission gratuite de la peine temporelle deuë à nos pechez desia pardonnez quant à la coulpe.

Comment les pechez nous sont-ils remis quant à la coulpe?

Par le moyen du Sacrement de Penitence dignement receu, ou par vne vraye contrition lors qu'on ne peut recevoir ce Sacrement.

Qui est-ce qui peut donner des Indulgences?

Le Pape à tous les fideles, les Euesques à leurs Diocesains.

Combien y a-t-il de sortes d'Indulgences?

Il y en a de deux sortes 1. Plenieres

par laquelle toute la peine due au péché est remise.

2. Non plenièrè , qui ne remet pas toute la peine.

Qu'entendez-vous par les Indulgences de certains iours , ou certaines années , comme des sept ans , & sept quarantaines ?

Cela veut dire , qu'en faisant comme il faut les choses prescrites pour gagner les Indulgences , on obtient de Dieu la remission d'autant de peines dues à ses pechez , qu'on en scauroit racheter en faisant penitence , comme autrefois il se pratiquoit en l'Eglise , l'espace de sept ans , ou sept quarantaines.

Qui sont ceux qui peuvent gagner les Indulgences ?

Il n'y a que ceux qui sont baptisez , & qui ont la foy Catholique , & la conscience exempte de tout péché mortel.

Quelles dispositions faut-il pour gagner les Indulgences ?

Faut estre en estat de grace , & accomplir tout ce qui est enjoint pour les gagner.

P'e-t-on gagner les Indulgences pour les trépassés ?

Ouy, par maniere de suffrage, en faisant & accomplissant les choses prescrites à leur intention.

Quels fruits faut-il retirer de cette instruction ?

1. Remercier nostre Seigneur d'auoir laissé à son Eglise vn tresor inépuisable, tel que sont les Indulgences.

2. Nous disposer à les gagner le plus parfaitement que nous pourrons, & plustost pour la gloire de Dieu, que pour nostre interest particulier.

3. Tascher d'en faire part aux ames du Purgatoire quand nous les gagnerons.





REGLES QUE DOIVENT observer les Enfans.

*Tirées de la doctrine Chrestienne de S.
Charles Borromée.*

1. **R**ETOVRNEZ au dortoir sans vous arrester par le chemin modestement, c'est à dire, sans crier, sans iniurier ny offenser personne : au contraire, si on vous iniurie & offense endurez-le pour l'amour de Nostre Seigneur, & dites en vous-mesme, Dieu vous donne repentance de vostre faute, & vous pardonne, comme ie vous pardonne.

2. Gardez-vous bien de iurer, de blasphemer, ny de dire des paroles sales & vilaines, ny de faire aucune action des-honneste.

3. Gardez-vous bien en table ou ailleurs, de demander, prendre, soustraire en cachette, ou autrement, ce qu'on aura donné à manger aux autres, &

mesme vous ne deuez pas le regarder avec enuie.

4. Ne hantez point les petits garçons, ny autres, vicieux & méchans, car ils vous peuuent endommager, & au corps & en l'ame.

5. Si quelqu'un de ceux de la maison ou autre, dit ou fait quelque chose deshonneste ou indigne d'un Chrestien en vostre presence, reprenez-le avec douceur.

6. Tous les iours, si vous le pouuez, entendez la Messe deuotement & à genoux, & leuez-vous quand le Prestre dit l'Euangile.

7. Gardez-vous bien de mentir en quelque façon que ce soit, car les menteurs sont les enfans du Diable, qui est le pere de mensonge.

8. Somme, tous vos principaux soins & desirs, tandis que vous viuez en ce monde, doiuent viser à vous rendre agreables à Dieu, & ne point offenser cette diuine Maiesté, afin qu'après cette vie mortelle vous puissiez euitier l'Enfer & posseder la gloire de Paradis. Ainsi soit-il.



S. IEAN CHRYSOSTOME
contre ceux qui se comportent
irreueremment & insollement
en l'Eglise.

Hom. 24. sur les Actes des Apostres.

O hardiesse insupportable ! Quand
ferons nous l'œuvre de nostre sa-
lut ? Comment pourrons nous appaiser
l'ire de Dieu ; puisque dans le temps
opportun , dans les lieux conuenables,
pendant que nous esperons flechir Dieu
par nos Oraisons , i'en voy quelques-
uns empêchez de leur contenance, cher-
cher des amusemens , ou indiscrets en
leur babil , ou folastres en leurs risées,
troubler les prieres publiques : & il y en
a d'entre-eux qui ne se contiennent pas
mesme pendant que le Prestre fait ses
fonctions Sacerdotales. O effronterie
insupportable ! Ne sçavez-vous pas que
vous estes au milieu des Anges , que
vous rendez vos actions de graces avec

eux, & neantmoins vous estes dans vne posture messeante, vous passez le temps à causer ou à rire? En verité ce ne seroit pas merueille si la foudre tomboit, non seulement sur leurs testes, mais aussi sur les nostres, car ces crimes sont dignes d'un tel supplice. Le Roy des Rois est present, son armée est à ses costez: & vous causez, vous riez à leur veüe, ou du moins vous ne corrigez pas celui qui cause & qui rit: Mais iusques à quand nous contenterons nous de les reprendre & de leur faire des reproches? Ne faudroit-il pas chasser de l'Eglise telles gens, comme scandaleux, comme larçons, comme corrompus, & comme des pernicioeux remplis de tous maux? Iusques à quand riront-ils, en vn temps auquel ils deuroient en auoir horreur? Iusques à quand causeront-ils, pour empêcher les benedictions de Dieu? Ils n'ont ny respect pour les Anges celestes qui sont presens, ny crainte pour leur souverain Iuge qui les regarde. Ne nous suffit-il pas de nous comporter lâchement dans nos pensées, & de nous laisser emporter à tant d'objets diuers:

pendant nos Oraisons ? Mais nous ne contenons pas mesme nos ris & babilz immoderez ? n'est-ce pas faire de l'Eglise vn Theatre, & du Service diuin vne Comedie, où l'on iouë toutes sortes de personnages ? C'est pourquoy ie vous recommande à Dieu : Et pour vous autres qui ne tombez point dans ces excez, ie vous assure que si vous n'auertissez, & ne corrigez celuy que vous verrez faire vne action desordonnée, principalement en ce temps, vous serez iugez & condamnez avec luy. *Corriger est plus que prier.* Quittez vos prieres, & le corrigez, ainsi vous luy profiterez, & vous en aurez recompense.

Homel. 36. sur la 1. aux Corinth.

LO R S (*parlant du temps des anciens Chrestiens*) les maisons d'un chacun estoient des Eglises, maintenant l'Eglise est vne maison : Encore en vne maison bien rangée vous y verrez vn bel ordre, mais icy il n'y a que bruit & confusion : si quelque amy ou parent venoit de loin, on ne luy parloit, ny

on ne le saluoit point en l'Eglise, mais dehors : car l'Eglise est le lieu des Anges, des Archanges, & de Dieu mesme, c'est le Royaume de Dieu & le Paradis mesme : Et nous plus impudens que les chiens, ne rendons pas tant d'honneur à Dieu qu'on en rend aux femmes de mauuaise vie. Maintenant nos Eglises ne sont point differentes des marchez ou des places publiques, ny s'il est loisible de le dire, des places vilaines & infâmes, puisqu'on s'assemble aux Eglises avec autant d'ornemens lascifs & impudens comme là : Et si quelqu'un veut voir ou porter au mal vne femme, il croit ne pouuoir trouuer vn lieu plus propre à cela que l'Eglise; s'il veut vendre ou acheter, il le fera en l'Eglise aussi bien qu'au marché.

Sur la 1. à Timothée.

VENEZ vous à l'Eglise pour danser? cherchez-vous des nopces & des attraits de lasciueté en l'Eglise? cet habit n'est pas conuenable à celuy qui prie? vous estes entré au Temple pour

prier Dieu, & avec larmes recevoir de
luy le pardon de vos pechez, pourquoy
donc y entrez-vous paré d'un orne-
ment immodeste, & peu conuenable à
vne ame penitente?

Sainte Marguerite Reine d'Ecosse,
le 10. Iuin, ne vouloit point qu'on trai-
tast des affaires en l'Eglise, car disoit-
elle, c'est le lieu pour prier, ou pour
pleurer, non pas pour autre chose.

E L N

